



金東山文集卷之九

江都金門詔東山氏撰

門人子姪同校

議

聖廟五王昭穆位次議

傳

崑峰吳侍御家傳

田潛菴先生傳

亡弟金蓮西傳

內人許氏行畧

金烈婦行畧



誌

李母陳太夫人墓表

李木菴先生墓誌銘

葉九疇先生墓誌銘

書

上西林夫子書

再上西林夫子書

上水利大人書

上樓村王殿撰書

答吳門錢郎書

啟

宋大中丞壽啟

富平理學孫先生雙壽乞言啟

吳門謝貞女徵詩啟

祭文

祭劉太守母朱太夫人文

祭田姑文

豫章祭亡弟蓮西文

代友人祭許親家文

金東山文集卷之九

議

聖廟五王昭穆位次議 有序

伏讀部文奉

上諭將肇聖王裕聖王詒聖王昌聖王啟聖王加封王爵改

造聖祠誠千古未有之盛典萬世不朽之鴻猷也但昭

昭穆位次部文未經開明或有議正位南向餘依世次

東西分列者或有議五代並皆南向止照左右次叙分

別者未有定論時 門詔 館於西林夫子藩署中蒙師命

考據經典酌古準今務期詳核議上督院大吏允行下



之所司兩江學宮畫一遵行議曰

謹按典禮各該學所稱肇聖以下昭穆位次所謂正位南向餘依世代東西分列者非也所謂並皆南向照左右次叙分別昭穆者亦非也嘗攷諸經義周禮春官小宗伯辨廟祧之昭穆而昭穆之名始見於此禮記王制天子七廟三昭三穆與太祖之廟而七諸侯五廟二昭二穆與太祖之廟而五而昭穆之位次未有聞焉祭統曰夫祭有昭穆昭穆者所以別父子遠近長幼親疎之序而無亂也此雖主生者之昭穆而言而亦可知昭穆之義大抵取於有別有序而無亂者也至於昭穆位次於經義皆無所據後世

儒者議論紛紜鮮所遵從古今禮制既殊其廟貌規模廣狹豐儉之度亦難以古制相繩惟博採朱子之論明乎禮意之所在以為之折衷可耳朱子嘗引孫毓以為外為都宮太祖在北二昭二穆以次而南攷諸孫毓之說宗廟之制外為都宮內各有寢廟別有門垣太祖在北左昭右穆差次而南由此觀之則廟中之主昭穆各不相望而義取於有別今所謂並皆南向左右次序分別昭穆者是無別之甚者也故謂其說非也朱子之言曰太祖之廟始封之君居之昭之北廟二世之君居之穆之北廟三世之君居之昭之南廟四世之君居之穆之南廟五世之君居之廟



皆南向各有門堂寢室而牆宇四周焉凡廟主在本堂之室中皆東向及其祫於太祖之室中則唯太祖東向自如而為最尊之位羣昭之入乎此者皆列於北牖下而南向羣穆之入乎此者皆列於南牖下而北向者取其向明故謂之昭北向者取其深遠故謂之穆蓋羣廟之列則左為昭而右為穆祫祭之位則北為昭而南為穆五廟同為都宮則昭常在左穆常在右而外有以不失其序一世自為一廟則昭不見穆穆不見昭而內有以各全其尊由此觀之古者廟皆南向廟主皆東向羣廟之制雖左昭右穆皆以各全其尊惟祫祭始屈於太祖之尊而就南向北

向之列則各全其尊者常也屈於所尊者暫也今所謂正位南向餘依世代東西分列者是使居正位者止一肇聖自此而下雖啟聖亦不得以自全其尊而常就旁列故其說亦非也朱子之言又曰後世公私之廟皆為同堂異室而以西為上者何也曰由漢明帝始也降及近世諸侯無國大夫無邑則雖同堂異室之制猶不能備南渡之後無復舊章雖朝廷之上禮官博士老師宿儒莫有知其原者是古制之不可復見朱子已言之矣然則如之何而可為之準古酌今依經傳義則莫若廟固南向主亦南向不可謂古是而今非也况弟子之於先師後人之於先聖主既



南向則主祭者以下皆得北面是南向之禮固一定而不可易者也而欲各立一廟以成尊勢有不能同居一室而無別禮又不可今惟就廟之中隨其地之廣狹分為五室所謂五室者非能準諸古制不過如今之所謂龕是也以肇聖仿始祖之禮居於正北裕聖居左詒聖居右稍次而南更約前尺許而肇聖之室視裕聖詒聖約深尺許裕聖詒聖視昌聖啓聖復約深尺許從外觀之則五室並齊從內觀之則位之淺深各殊系之尊卑自別則五聖之靈其亦可安矣乎要而言之則同在一廟即外為都宮之禮也肇聖居北即太祖居北之禮也四聖以次而南即二昭二穆以次而南之禮也左昭右穆即不失其序之禮也各為一室即各成其尊之禮也子游不云乎其庶幾亡於禮者之禮也其動也中予不敢自謂其說之果中亦庶幾亡於禮者之禮也夫若此者變而不失其為常也權而不害其為經也變而可常權而可經則於禮也其庶幾乎



崑峰吳侍御家傳

公諱玉字之璋一字和璞號崑峰山西壽陽縣人世以詩書為業父成美尤篤志好學居鄉醇謹由貢生以公貴累封文林郎廣西道監察御史公甫釋褐筮仕即手書訓之曰母以一第喜母以民社戲母以家風清白博長物母以累世忠孝易浮名以故公一生忠義大節其得于庭訓者深也母傅氏封孺人於萬曆丙戌生公公生而才氣雄偉為經生業下筆千言立就試輒冠軍與代郡孫傳廷為布衣交相期以天下事胸懷坦率平居若漫無短長可否者及遇義所當為雖陷井在前弗顧天啓辛酉登賢書壬戌



登第初任博野令尋調蠡縣釐奸剔弊大著政聲欽授江  
西道監察御史莊烈帝新立誅魏黨時元惡初剪積習未  
除廷臣舉劾率多徇私報怨帝詔開言路崇禎元年五月  
公應詔慷慨陳奏直糾同惡邪臣以清仕路以維新政略  
云國家去邪之典與任賢並重誠以邪不去則賢不得任  
况以巨奸之盤據為羣奸之線索者乎巨奸者誰楊維垣  
是也羣奸者誰趙興邦阮大鍼等是也維垣特天啓三年  
一例處之死灰耳值逆璫啣怨揚左諸人乃先諸媚臣認  
為義子故孩兒之結納中旨之起用自維垣始君子已於  
是知履霜矣維垣辣手橫施一時正人君子百方羅織殺

竄殆盡迄今迴想當日諸臣所遭光景朝衣冠而暮楚囚  
酸盡路人之鼻屎流蛆而血化碧慘傷忠義之心則維垣  
之內可食皮可寢幸天祚皇明神聖御宇一切魑魅之徒  
如日當空無處躲閃乃維垣早為知覺以為不尋一絕好  
題目以占後來地步則護身之符不靈不叅一絕大奸回  
以為逆璫出脫則冰山之倚易倒遂舉從前之惡盡委罪  
逆崔而於忠賢則段段獎譽字字揚誦舍元凶而問羽翼  
意欲何為然猶曰為忠賢也子宜為忠賢也諱不忍翹其  
親之過以為名迨巨璫殲而眾怨雪奸燄冷而泰遇新維  
垣之面目既思一番脫換維垣之肚腸宜加一番洗濯孰



知梟性到底難除鷹眼終久不化把握朝政毫不放鬆眈  
視廷臣慘切更緊非我族類竟爾加膝升天是吾正人立  
見擠淵下石試舉維垣管察時所行孰非植黨之圖而排  
陷之巧也者故四凶是列之趙興邦起客卿矣九尾狐媚  
之阮大鍼登啓事矣老手殺人之徐大化透線通靈之周  
大成騰薦牘而補中書矣清直有執之韓爌重抑以非賢  
表表詞林之文震孟錚錚史館之鄭鄮厚誣以莫須有矣  
凡此之類未易更僕豈維垣好惡之性獨殊抑其孝於忠  
賢故不改其臣不改其政與孟莊子合耶猶曰忠賢以驕  
子怙之故維垣以慈父報之以愧天下為人臣子懷二心

者至皇上消融意見之諭再三諄切何猶以魔話鬼語弄  
影于白日青天舉海內名賢滿盤打算欲盡以供刀俎之  
用出其舊日屠手試此時一番新斫方且曰某某為三千  
諸佛也某某為八大金剛也某與某傳衣鉢也將見昔以  
點將諸錄殺之尚餘碩果者茲以無端妖言殺之必無噍  
類矣清流白馬之禍尚忍言哉維垣雖數經彈射止聽部  
議而諸奸又概未摘發必為燃灰捲土之計興言至此良  
可寒心伏祈皇上帝奮乾剛立施睿斷削維垣以洩衆怨  
之鬱不必滋部議之葛藤罷諸奸以快輿論之公立清其  
羣枉之糾結庶朝蠹清而新政光矣况邇來魏腥崔污不



獨濁人耳目抑且染人肺腸即如要典一書倪元璐以虛公之見奏請欲毀而孫之獬伏闕上疏且破涕與閣臣力爭無論燬要典非可哭之事君門非痛哭之所而冊封之際更非宜哭之時忠賢以要典一書殺盡天下名賢之獬非哭要典也哭忠賢耳哭其不能以假借之威靈庇忠賢於昔日更不能以遺留之墻壁護今日之忠賢耳此其為逆璫私人不問可知統祈聖明嚴處焉奏上楊維垣削籍阮大鍼孫之獬各引疾趙興邦原未起用徐大化久回籍不深究公覽旨以周大成未奉處分復奏為再糾無法奸臣以伸言路之氣略云臣疏劾楊維垣隨及趙興邦等蓋

以諸奸俱係維垣私人繩繩相引既欲招類以呼朋着着存心更欲翻天而覆地爭世界消長關頭甚鉅也寬處奸臣而不為削除已非臣請劔之初意矣獨周大成者三穴深藏百足強固臣言自峻躲閃如不聞聲彼身自綿票擬毫不貼體則觸邪之羊幾不敵憑城之狐矣伏祈皇上查臣所劾奸臣六人而大成獨遺處分是何神通施此伎倆立為正法以為閣中近臣舞文自庇之戒至大成瞳朽睛楛玷內翰之清班剩魄殘魂為崔魏之餘穢暮夜暗投二千金始進身於何人早晚密傳五綸音通消息於何地臣固不必縷言止此逃躲票擬一事罪已不勝誅矣臣更為



相臣規焉揆席之地一切票旨為天下持平乃么麼屬官且不能毅然一剖其又何能為皇上斷乃公事以割割天下也願相臣監起勁骨洗清柔面於惟公惟斷中尋千秋相業之隆不宜於且濡且染內負一代聖明之主奏入周大成着閑住時劉鴻訓為輔臣銳意維新魏崔餘孽多被剪除御史高捷詆排之公復具疏劾捷畧云自魏崔擅權一切邪媚之徒盡出其門及殲滅之後抱頭鼠竄者固多矯語人世者亦復不少世道仍於此爭消長矣幸賴皇上天聰睿斷輔臣極力維持故陰翳世界如疾風之掃秋葉不獨義子孩兒之輩無處安身抑且藏頭露面之夫沒法

躲閃詎不為亘古中興景會也哉乃有彈劾輔臣以威劫百官橫搖唇吻以箝制萬口如高捷其人繼袁弘勳而狂吠者乎舉明旨所處分楊維垣等俱代為極口稱冤豈以彼等皆品係忠良而受輔臣摧折耶試一提衡而論楊維垣以攻局護局幾成鉄筭山河矣張訥則以殺人媚人變作羅織世界矣始附逆璫繼附維垣人稱九尾神狐者非阮大鍼乎先博璫喜後挑璫怒眾誚百足恠物者非霍維華乎出脫崔賊釀成翻天覆地禍胎伏屍逆璫嘔出義子乾兒心胆請修三案以定諸臣罪據為出死力以斷眾正生機而李恆茂孫之獬楊所修謝啓光之行徑又歷歷如



譜也止有一賈繼春嫉邪破黨差強人意而要典一疏終不能自解于正人捷乃以出脫羣奸之口為反噬輔臣之舌必欲翻案見竒則是西市銷魂囹圄落魄施之忠義不為慘而褫職天朝投閒林壑施之奸佞便為刻耶試迴想楊左諸人何以肢體流蛆虫而出戶何以冤魂搖棘木以悲鳴何以幽囚數載淒其羞對南冠何以摘伏要荒夢想不到魏闕則要典一書審囚錄黨人碑也乃謂毀要典毀綱常也天下有此殺人之綱常也哉捷與弘勳原皆魏崔嫡派彼見維垣墜其家聲已不勝色慘而心悲又見諸子俱為零落更不禁兔死而狐泣遂借輔臣為發難之端假

摧折為反間之計欲掀翻株守之小窠巢以恢復滔天之大局面耳語云兩葉不去將尋斧柯為虺不摧行將為蛇亟為屏除無使支蔓當不待臣辭之畢矣疏入帝以輔臣鴻訓克佐新猷毗倚方殷高捷隨聲狂吠顯干清議示以薄罰尚寓愛惜言官之意回籍免究六月公又以清核七款具題一曰冗官太多二曰冗役太繁三曰冗費太濫四曰兵餉侵冒五曰招買侵剋六曰興作冒破七曰侵盜宜核帝以邇來東西交訏度支匱乏清核七款深裨國計即命飭行公又以增館一事直糾洩旨之人實由內閣中書周承禹請併下法司更以中書為內翰清班外吏羨若登



仙乃邇來市井之徒非以文學取非以事例進巧為黃緣朝遊棍而暮冠裳名器褻越莫此為甚前疏請汰冗負隨及內閣中書者非止為司農塞耗蠹實欲為綸扉清匪類也今洩旨之人果在中書豈非此輩無賴小人不自愛惜之一證耶清華要選關係匪輕莫若定其員數考孝廉恩選之有文行者題補庶人皆自愛其鼎而要地之奸類清矣帝以增館洩旨甚非所以肅禁扉而嚴政本也張士範列名疏首佯為不知情屬欺侮併張星周承禹等下法司擬罪八月又以樞臣王在晉冒濫軍功具奏叅劾帝以疏內事情着王在晉逐一回奏復召對文華殿令公自讀叅

王在晉張慶臻疏中有在晉倚為泰山者為誰一語帝問閣臣皆謝不知帝怒給事中張鼎延御史王道真咸言慶臻行賄有跡不知誰主使公仇聲曰主使者劉鴻訓也詞不少屈帝歎曰真鐵面御史也公復奏疏云鴻訓每在上前力保在晉可用兩人結為至交凡一切推陞無不密商遠京營總督梁世勛罷去慶臻鑽刺其缺密令家人張宜夏通于在晉之子介其周親家以言于在晉與劉鴻訓各萬三千金職方苗思順六千金並許諾於是緘諸食盒以將曰餽果而擔者皆心訝其重也道路爭眙目以視一時長安縉紳以至走卒爭傳而駭之及召對時如張鳳翔鴻



訓同鄉也亦不能諱謂臣言確而有據則增敕書者非鴻訓而誰四月來外議沸騰鴻訓已膽落心驚忽聞臣疏遂托病不敢入朝此鴻訓自知之明自供其狀也皆由臣之扶其病根刺其膏肓豈真二監之為侵哉且貪婪是其本色驕橫是其故態聞其欽取就道時每經一驛家人欽取多金行至雄縣有大使張養性者貧無以應縛諸樹鞭朴橫施血流遍體縣令不得已借庫帑數十金予之始解養性遂仰藥而死縣令鳴其冤申之府有云頓令茹藥苦官倏作吞聲怨鬼天理人情難為公道皇天后土實可鑒憐此貪黷自恣草菅人命是其明証也臣非不知鴻訓之勢

熖足以殺臣竄臣然臣報主念切顧忌心微即罹克鋒所甘心矣帝覽奏大怒欲寘鴻訓於法閣臣李標錢龍錫請更察訪帝曰事已大著何更訪為禮部尚書何如寵為鴻訓力辨帝意卒不可回明年正月吏部尚書王永光等言鴻訓慶臻罪無可辭而律有議貴條請寬貸帝皆不許詔曰閣部大臣表正百寮共襄治理乃有敗類負國如劉鴻訓王在晉二臣者鴻訓納賄增勅欺君律應肆市朕不過守祖宗三尺有何成心但卿等會議至再輔臣面祈揭救稽八議之說覽合辭哀懇寬其一死發邊遠充軍王在晉狗私受囑隱匿面欺斥革不盡其辜亦為卿等寬貸苗思



順放回原籍張慶臻念係勛庸之後着停俸三年科道官  
吳玉叅劾有據加銜一級今將大畧明告臣僚朕御極以  
來此為首犯尚染頽靡未經振飭姑從寬典以後大小文  
武各秉公廉務保身名慰朕厚望毋得希此為例二月公  
奏辭加級帝不允令遵旨加銜并勅建坊賜忠謹二字公  
感時遇主知無不言類皆曉暢愷切洞悉利害數月中彈  
章十餘上臺中目為慇直直聲震天下未幾以外艱歸當  
道公私過往者咸懾伏不敢肆曰壽陽今卧一虎矣其為  
人畏憚如此然亦由此見惡羣小服闋後數年不起用迨  
四路寇起中州盜賊充斥數百里無人煙而饋餉分沓羽

檄催徵旁午于道忌者思有以中之乃外遷為河南道叅  
議專督糧儲公既至痛時事不可復為遂扼腕憤恚而卒  
於任時崇禎十三年年五十五歲娶傅氏繼娶李氏先後  
封孺人皆無所出副室張氏時年纔二十即自誓撫孤值  
逆闖肆變沿戶索餉母傅太孺人倉皇無計張氏請代為  
應比拷掠刑獄無不備嘗因泣語家人曰吾何難一死異  
兩孤兒成立吳氏一脈視此耳忍痛含悲四十餘年未嘗  
少懈生子二長運隆廕生次運泰庠生泰無所出隆生子  
二長蘭次蕙並國學生候選縣丞蘭生子一延齡丁酉科  
舉人候選知縣蕙生子一嵩齡庠生延齡生子二長眸候



選州同次俊廩膳生員嵩齡生子一融廩膳生員自公沒後里人思慕之請諸當事崇祀鄉賢又崇祀忠義孝弟祠至今過忠謹坊者莫不加敬以為法張氏崇祀節孝祠與公並載入省志及縣志

壽陽外史金門詔曰予往者備員明史館見公之行事得之李標劉鴻訓王在晉諸傳中畧悉其忠謹之概未稔其詳也及來壽邑訪求先賢遺蹟見公元孫眸得讀公奏疏全集乃深惜公之未得專立一傳以故所載尚有未備已叙其集而歸之眸矣茲復撰為家傳取其奏疏薈粹其要著之於篇後之讀者以視賈生之可為痛哭可為流涕者何如也悲夫

潛菴田先生傳

先生諱見龍字君德江都人晚年自號曰潛菴家世故儒者當少時即求學為聖賢性方正不苟言笑步趨必中繩尺容儀閑麗瀟灑癯而清頎而長朗然如玉山照人鬚髯尤美望之飄飄然神仙中人也年八十四以考終年齒既高德且劬諸子若孫又皆賢且才其季子有伊舉孝廉先生實訓之非孔孟之書不道非其行亦不敢行故稱之曰先生其先世居晉之蒲坂高曾來皆以明經名于時父正儒公諱士英端方士也萬曆間挾筴來揚遂家焉母周太孺人性賢淑以苦節老先是父年逾壯未有子當崇禎



之庚辰十二月二十一日誕先生年已五十生而至性過人甫六歲值鼎革王師下江南為將軍某馳去將軍殊愛憐之撫為已子携京口者數月日夜號泣念父母不絕口其父訪至將軍所將軍願以黃金三斗易父不從徑入見老幼相持抱號泣俱仆地將軍亦心動予以歸歸見其母號泣亦如之及就外傳必求解大義既通曉即曰我知之矣讀書學聖賢耳里中有名儒金先生者今父子崇祀鄉賢元亮公也見其容止非常曰吾今相攸矣以女字之少先生二歲以淑慧著聞年十七來歸盡婦職夫婦相勉以孝其父年就衰私竊憂之嘆曰讀書莫大於孝孝莫大於養父老矣吾為其逸父為其勞安用若子哉請以身代父業於是綜家務躬勞苦習節儉潔滌澣以奉兩親曰但得兩大人康強無恙晨夕趨堂上奉笑言雖卿相之尊不以易吾樂也甫三載海寇至奉二親避兵赤岬湖之濱時炎暑方熾父忽以疾卒當流離頃倉卒經營殯葬成禮觀者以為難顧以奉養未久又值播遷在外罹此鞠凶哀毀幾絕自後奉其母侍養五十年未嘗一日少衰也歲丁亥母年九十

仁皇帝奉

皇太后鑾輿南巡將至郡其母曰我老人願一覲天顏可乎遂



承其意敬諾曰豈惟老母即兒與媳年皆七十願從母後  
俯伏門庭祝 聖人壽效華封故事亦太平佳話也奚不  
可母又曰倘獲 天顏喜願得 御書一二字以表吾門  
為子孫光寵可乎則又敬諾曰我母苦節五十年今荷天  
之休年九十精力康強又生逢堯舜是天相吾母也如請  
必獲所求奚不可於是排几案懸燈張彩母盥手焚香斂  
衽曲跽起跪自如率子若婦及孫曾輩蒲伏盈門庭一時  
皓髮銀鬚行次羅列光明照耀洵可喜也及

天子過其門果大悅命止鑾輿眷顧殷勤詢問姓氏年齒及世  
系儼家人叮嚀狀母奏對詳明 天顏益色喜先生乃稽

首請曰臣母守節五十年願得 御書一二大字以旌母

節則臣母及臣子子孫孫世荷光寵

天子曰俞是不可以弗旌汝其往行宮朕書以賜乃稽首謝恩  
俟 駕行而退母又曰我老人欲有所獻為

天子壽可乎則又敬諾曰 聖恩高厚微臣無以報吾母願為  
芹曝之敬奚不可母於是親炊者三為餐饅之屬各丹以  
壽字凡若干篚襲以黃綺黎明賫至行宮外

仁皇帝聞之命中使傳入親書節壽二大字以賜謝 恩畢賚  
回敬鐫之懸諸中堂一時聞者以為榮皆嘆曰信善哉是  
母是子今日



天子旌田氏門不媿矣夫越二年母精力漸衰一夕以無疾終先生哀毀不少損復鐫諸墓乃仰天號曰

天子旌我母矣我不孝子無以顯吾親也督子若孫甚嚴每訓

曰存心制行我不敢望汝輩為聖人但當以賢人自勉無論所讀何書所習何業上之可以貽父母令名下亦不至貽父母羞辱汝曹須勤以修身儉以養德無論富貴貧賤不可忽也汝曹才質各別須就汝所長各執一業毋忘事毋曠職我家自高曾來讀書種子未嘗絕即汝祖若父苟稍暇卷常不釋手汝曹中有能讀書成名以光前烈者尤我願也諸子若孫皆恂恂克承克訓長子有慶自少即隨

左右既善體親心復倜儻多才畧孝友惇篤然諾不少欺里中雅甚重之三十年來得以分憂息肩葆生延年者長子之力居多仲子有年克自成立先卒已十餘年矣叔子昫尤純樸嘗以至戚被誣貽累慨然以身獨當之不及一人至破家蕩產兄弟同心協力以助卒以釋其冤事畢不少怨季子則孝廉有伊也少穎異嗜學先生夫婦尤愛之常囑曰吾夫婦晚年得汝汝諸兄皆能自立以供吾朝夕吾無憂唯汝年少倘得令吾兩老人及見汝成名吾無恨矣乃令從舅氏金聖隣先生學朝夕出入常侍側寒暑疾病不少輟業既工出而試之太守趙公賞其文拔第一學



使楊公復賞之拔第二衆皆為先生賀先生勗之益嚴丁酉登賢書先生夫婦年皆近八十命之曰汝幸少有成就以繼先緒我兩人未嘗不色喜然此後更須向上以圖報國毋自畫季子奉命唯謹止一女先諸子生性篤孝適庠生吳秉訓奉堂上兩世孀姑未數年亦寡門戶幾衰撫四子俱賢能今復大振先生之教也長孫毓行已入國學諸孫多國器未可量同胞止一姊適魏氏早卒撫二甥彌篤曰我不及見屈孀每誦渭陽未嘗不為二子流涕云生平無一言動欺人聞人善則稱道不絕口見有過輒面規諷之不樂效世俗周旋曰直道而行安用取媚為哉以故落落寡合愛恬淡不尚華靡居身殊儉約至睦嫻任卹拯災捍患之事若素封然壬寅正月金孺人病四月卒年八十一先生春秋愈高又失賢助居常怏怏踰年七月微病數日十二日卒卒之時風骨峻峻猶動人敬慕焉

金門詔曰予綰角即從先君子讀書田先生家朝夕聆其議論又親見其行事大抵與曲禮論語小學之書若桴鼓予當時亦以為固應爾爾長而與世接往往見有聖賢自處者聆其言論非不鑿鑿可信及觀其所行抑或張而大之恢宏揚厲遠有過焉至求其誠篤根于天性無一毫勉強造作之意如先生者蓋亦希矣可不謂有道君子乎然



先生不求知於世世亦鮮知先生者嗚呼此潛菴先生之  
所以為潛與先生夫人為先君子同胞女弟先君子兄弟  
及女弟凡三人如一人予於先生固小學所云稱姑夫者  
予自幼從其稱其季子與予為同年兄弟稱謂則仍從其  
重不改其舊而以稱於當世則亦曰先生公之也不敢以  
私稱云

亡弟金蓮西傳

奉  
史部取  
館

金殿詔字蓮西康熙乙酉舉人江都三賢玉節孫奇選次  
子年十一失恃隨父館海濱嘗語父曰兒不幸失母又不  
能養父致父遠行皆兒罪也含淚飲泣日夜憤懣日成十  
數藝涵涵如泉湧皆有寶光見者無不愛賞郡先達都御  
史李柟嘆曰此金殿中人語當是青蓮化身遂錫之名曰  
殿詔字蓮西邑令張瑀河內名進士試其文曰仙筆也拔  
第一傳太守亦拔第一遂入泮諸選家皆購其文稱金氏  
一家言所刊殿詔文尤多父卒哀毀滅性父易簣時囑曰  
兒雖有文名但讀書要有根柢父喪畢遂砌一小闕不盈



丈。僅容几。膝留一小穴。進粥飯。乃大書遺命曰。讀書要有  
根柢。六字。復作孤兒吟三十首。題其下。且泣且讀。日誦十  
三經註疏。每一經熟。輒啟闕焚香。跪誦父前。誦畢。復入闕。  
徧誦既周。每夕作文二十餘首。語出必驚人。韓城張學使  
至。激賞不已。旋以乙酉登鄉薦。主司王之樞。廖騰燧曰。奇  
才也。輦下公卿交相引重。同年吳士玉。王澍輩。皆喟然曰。  
吾輩不及也。士玉所選篋中集。及他名選中。無不推服。已  
丑。下第。吏部董佩笈典學江右。聘閱卷。辭不就。彊之行。途  
中得疾。遂卒于江西署中。遠近聞者。皆為詩歌哭之。曰。何  
造物忘才。乃喪斯人乎。至今悼之。所著有蓮西集二十卷。

先刊有首卷。所載有孤兒吟。讀者謂其哀音慘于蓼莪云。  
其詞曰。獨有孤兒情。悲聲到處生。呼天天不應。只自發悲  
鳴。獨看孤雲起。飛來片片愁。不知何日止。千古恨悠悠。獨  
指孤霞落。一時何處尋。恐還飛海畔。搔首發長吟。獨聽孤  
風發。吹來如繞梁。一般春習習。偏自惱人腸。獨分孤月坐。  
皎皎為誰明。皓魄曾相共。而今轉自驚。獨對孤花放。枝枝  
仍舊年。如何同玩者。花落不來前。獨驚孤草生。款款向人  
迎。枯草還青翠。人生何太輕。獨怪孤鶯語。淒然吐復吞。聲  
聲皆百轉。一轉一消魂。獨聞孤燕噪。還向舊巢棲。老燕飛  
何處。新兒戀舊泥。獨入孤林中。春光到處同。梁木胡先萎。



何地怨春風。獨步孤溪畔。憑竿幾釣翁。長年誰應得。為我  
問蒼穹。獨上孤橋望。人人渡暮春。杖藜幾許過。豈少高年  
人。獨傍孤亭立。一番花鳥新。昊天飛雨露。怵惕淚沾巾。獨  
坐孤山頂。春深鳥不聞。緣何一片石。粉碎忽紛紛。獨泛孤  
江水。往來無客過。但見濠梁上。鴉去只如梭。獨掛孤帆影。  
遙遙入海雲。海雲飛不住。海鳥嘆離羣。獨轉孤舟楫。淚痕  
點點潛。杜鵑啼不盡。留載滿船還。獨返孤門裏。而今不倚  
閭。未歸如在望。既歸如在廬。獨向孤庭趨。笳笳聽鷓鴣。詩  
禮曾學未。仰首發長吁。獨把孤箱開。十年幾去來。去時非  
獨去。來時胡自來。獨息孤齋內。強為開卷人。卷開無限恨。

手澤定晨昏。獨研孤硯墨。滴滴淚滂沱。血淚流難罄。愁雲  
奈若何。獨將孤管搦。海角寄兜書。今搦孤兜管。修書寄太  
虛。獨懸孤鏡照癡眼。鏡中尋昔日。照離別。今年照古今。獨  
倚孤燈影。依然把手挑。挑完終不見。風雨故瀟瀟。獨橫孤  
枕卧。輾轉不成眠。著枕還相見。枕離不得前。獨聽孤鐘響。  
一聲迥斷腸。宛然共笑語。猛省入淒涼。獨吟孤韻詩。縷縷  
發哀思。哀怨從何訴。蒼蒼亦不知。獨誦孤憲下。書聲間哭  
聲。彌留留六字。痛讀不緣名。獨檢孤編閱。難忘為客情。客  
情今已矣。慘聽孤兒吟。觀此詩。不忍卒讀。他詩文不能盡  
載。又有編輯四書人物續考一百卷。年三十四而卒。生於



康熙丙辰九月十九日卒於己亥八月初二日江南乙酉科第三十七名舉人已丑授內閣中書舍人子二人長帶次甲皆史館議叙就外史

附載

天下之至神者莫如二親世之人事神事鬼無為也江都金莪村先生少失恃困童子試淬厲讀書雖溽暑日成制藝十餘首受知於郡邑侯冠其曹隸博士弟子員作泮林思母文令人不能卒讀尊甫幼常公寢疾易簣時謂曰讀書要有根柢服闋先生盡謝人事鍵闕斗室額六字其上下帷穴明誦繹六經一室之外如無他室

一經之外如無他經一卷之外如無他卷熟復之無纖毫疑悞於設主前焚香跪告曰兒某經某卷畢矣二年次第卒業康熙乙酉南闈擢管若有神助登賢書作桂林思父文先是有孤兒吟三十章哀切之音不啻猿嘯鵲啼千載而下豈獨哀哀父母生我劬勞之什令人誦不終篇也憶先贈公柳村府君嘗訓不肖曰報人者不報其人而報其人之天又嘗訓曰天不負苦心人不負孝心人不負道心人嗚呼若小子者苦乎哉道乎哉孝乎哉五夜疚心抱恨終天馬而已每讀莪村先生遺文若詩稽其行狀及其尊兄東山太史家傳未嘗不反覆



三歎淚為之泫泫下也。我故曰：天下之至神者，莫如二親也。先生名殿，諱字蓮西，系出漢武時稅侯。後唐廣明中，博道公遷休寧，明九疇公遷江都，祖玉節，父竒，選幼常其字，並庠廩增生，同祀學宮。鄉賢兄即東山太史諱門，諡別見余文序中。先生幼穎異，鄉先達都御史李公柵竒之，贈以名字，菽村吟孤兒詩，時自號也。所著文風行海內，有金氏一家言及華鄂集諸本。中鄉試後，授內閣中書舍人，未仕家居，欲力學以大究其用。己丑吏部董公佩笈膺江西學使，過邦上，邀之主衡，同行病瘧，歿於宗人南昌別駕署。中年三十有四，配藍氏孺人，聞之號慟，持刀引決，未殊，復自經，為家人解救。及夫柩得引例入城治喪，椎心嘔血，撫其所生子，越七年有成立，哀號不食以死。大學士鄂文端公聞而嘆曰：賢哉烈婦也。夫兄太史為作烈婦藍氏家傳，上之史館。子帶，南屏縣丞，為太史後章，殤甲永寧知州。前任安南知縣時，覃恩請贈考徵仕郎，偕文林郎，內閣中書舍人，妣孺人孫廷佐，諸城知縣，鑾佐，候補鹽大使。後南平丞曾孫桂沅，增監生，湘沅，附監生，梅沅，桃沅，和沅，元孫景福，嘉福，介福。論曰：予居學官，春秋俎豆金氏三鄉賢，永寧牧歸老，文孫桂沅，茂才及予門肄業彬彬乎，一門禮法，淮南之彥。



也。因得考次先生行事書之為傳。先生成名領鄉薦授  
舍人。先生不忘二親孝之所致也。稟命不永如顏子三  
十二而卒。何哉。孺人以烈自矢。立孤而後殉焉。孝烈之  
後必昌。宜乎其子孫之久而光大也。詩云。日居月諸。東  
方自出。父兮母兮。畜我不卒。人固有處窮而不知思其  
父母者。獨何心哉。乾隆丙申臘月八日甘泉縣學博新  
陽顧惇量頓首拜撰

內人許氏行畧

乾隆四年己未夏五。既望。家人劉坤齋書四匣來京。入門  
叩首曰。奉主命取書。今齋到矣。予因劉婦久病。而其夫忽  
齋書至。見而喜。輒問曰。汝婦病愈乎。對曰。未也。又問曰。前  
家報稱汝婦可無恙矣。信乎。對曰。雖小愈。未敢以為信也。  
時同年友葉君泊齋。鄭君板橋在座。談笑如故。未暇問他  
語。忽板橋使者近前。附耳唧唧。板橋變色起。欲行。予笑曰。  
豈可令使者速之行。即行。復強留晚飯。飯畢而散。予復進  
劉坤問曰。書畢來乎。曰。淵鑑類函。佩文韻府。及綱鑑賦彙  
等書。先已携來。十三經。廿一史。稍繁重。後即續到。今來者



諸小書暨手錄自著詩文集耳。正問答間，兒子帶忽於房內哭失聲，予聞而大驚，劉坤伏地哭曰：主母卒矣。然後以姪甲手書呈閱，乃知四月二十七日午刻，一暈不復能語，至戌氣絕，而孺人竟與我長辭矣。嗚呼！慟哉！予聞而心曲俱亂，獨不敢放聲一哭，蓋居嘗竊嘆予兄嫂及予兄弟凡五人，皆七十內外，所稱風前燭，草上塵，活一日，便受天一日之賜，有何足恃，而不謂孺人之先我也。我又敢自殞滅其身，而徒效無益之悲泣也。然而心不自己，淚不自禁，氣不覺自咽，神不覺自傷。既復閱胞姪甲、堂姪華及科，皆寓書曰：孺人自少壯至老，所持家政，所受辛勤，事上育下，皆

堪不朽，即當著之行狀，聊以慰存沒之心。予覩而泫然曰：予忍言哉！予上而風木徒悲，不能盡雞豚之歡，中而棠棣胥遠，不能有燕衎之樂，下而鵲鶴分飛，不能享齊眉之好。值茲哀暮，驅逐風塵，致使四十餘年糟糠結髮之婦，不能一親其含殮，拊心引咎，尚忍言哉！今即強顏執筆，亦奚補於生前乎。言至此，不忍言，又不忍不言矣。孺人姓許氏，徽州歙縣人，本唐模巨族，自祖康成公挾筴來邗上，與諸許望重兩淮，性長厚，壽登九十餘，生二子，長象坤，公諱寧厚，次仁先，公諱寧愛，皆國學生，仁先公即孺人父也。孺人生而四德俱備，公珍諸掌上，嘗曰：吾物色諸少年，鮮有能中



吾雀屏者。公與諫垣力承公諱承宣太史師六公諱承家稱昆弟。雖共高曾如同胞。然而諫垣太史二公與先祖父兩世交好。公故以得知金氏而並識其子孫。時予應童子試。孺人之兄亦應童子試。公於試院前望見予。雅器重之。歸而質諸師六公。師六公曰。金氏家世孝友。其後必昌。況此子年少能文。信可為相攸也。乃屬冰人以語先君子。暨先季父咸曰。可。適予於是時入泮。遂訂姻盟。丁丑冬月。孺人歸予。予母見背。已十一年。當合卺時。予思之痛心。淚涔涔如雨。衣襟盡濕。及孺人廟見時。淚亦潛然下。固知孺人之能賢矣。事先君子。曲盡婦道。事先季父。如事翁。事先孺

母。如事姑。當予十四歲。即失恃。先君子又遠館在外。十年來所恃以朝夕撫育者。皆先季父孺母之力居多。蓋未嘗異於所生。故事之亦不與所生異也。庚辰先君子從海濱解館歸。偶染疾。醫治數月。日益甚。孺人佐予治湯藥。未嘗解帶衣。釧典鬻畫。惟祝曰。但得翁愈。雖剝骨無悔。先君子疾篤。嘆曰。好新婦。吾福薄。不能受其養也。無祿先君子棄世。予昏迷。苦次。孺人佐吾孺母郭太孺人治喪。井井有條。四方來弔者。咸以為知禮。先君子生子。予兄弟二人。相倚為命。孺人與弟婦藍亦相倚為命。乙酉。予弟幸而登賢書。孺人喜曰。食書香報。自此始矣。又四年。予弟不幸而卒於江



西弟婦藍日夜號泣願從地下哭之七年而果卒遺孤二人曰帶曰甲帶即今之嗣子者也孺人皆撫如已出孺人本無子故鍾愛彌甚持家識大體祭祀必誠必潔親朋往來餽饌必豐而自奉則極儉非客至酒不御几肉不登庖至若先祖先君先叔舉鄉賢大典及婚姻喜慶之事則摒擋區畫至精至詳恐有失禮居常所處凡屋舍棟宇窓櫺戶牖之間及一器一物皆無一毫塵氛能入無一毫垢膩能染蓋愛潔喜淨其天性也其事予也敬戒無違予性卞急輒爲規諫加之詞色不怨也御下則嚴而有恩嚴則閨門肅清有恩則威獲皆驅使盡善此孺人生平之大槩也

孺人事親至孝兄弟四人女兄弟亦四人皆互相親愛其家素封門庭甚盛二十餘年間父母兄弟女兄弟相繼皆亡獨孺人僅存其感悼悲傷之景皆人情所難堪而今又謝世矣可勝慟哉念我孺人年踰六十壽非夭矣夫婦無恙老稱偕矣予既入詞林適荷

**覃恩**例應封爲孺人因貤封祖父母故未敢受

**勅**然於例應封其實自在福匪薄矣獨以自歸予門爲貧家婦雖稱四十二年伉儷而予自余弟亡後未忍安處以故居鄉日少在外日多即偶或家居帷帳各別計共床第者不及十年蓋非矯情實有所大不忍於中者故夫鰥婦寡不



自近今始也。而孺人處之恬如。至於身茹荼苦。拮据卒瘁之狀。無所不有。予性迂拙。不治生產。予性耿介。不受人憐。故家室之中。米鹽有無。從不暇問。然食指雖繁。從未嘗見絕於天。而當其有時。孺人則量入爲出。銖黍不妄費。及乎瓶罄壘恥。交謫之聲。不聞於耳。舉室饕殮自若。未嘗廢一餐也。而孺人則已苦矣。即如丙辰成進士後。半載未寄一家書。家中告急書頻至。其詞曰。薪米久匱。不待言。而報錄者索錢甚於追呼。奈何。時帶與甲。皆侍側。乃請曰。縱無貲可寄。當報以書。應作何部置。予笑曰。我已囑天公矣。六十年來。天未絕我。豈今倖成進士。反見絕於天耶。予惟事事

問心。交付上天。豈人力所能爲。當是時也。豈不知內顧。豈不念孺人。而一生未肯乞憐。至此轉肯失節耶。追念及此。我幾無以對孺人。唯孺人能諒我。惟上蒼能知我。於事不能無憾於心。實無愧怍也。孺人善事我。我何能不朽。孺人聞斯言。孺人可不朽矣。孺人生於康熙丙辰年十一月十九日子時。卒於乾隆己未年四月二十七日戌時。享年六十有四。丙辰。

覃恩

應封孺人。請貤封。辭未受。嗣子帶。由附監生。以明史館議叙。選江西萬安縣縣丞。未之任。於五月十六日聞訃。繳憑時。予在京邸。敘其事。以述其略。用請於



當代大人先生倘肯錫之誅詞俾得藉以不朽則存歿均感矣

*[Faint vertical text, likely bleed-through from the reverse side of the page]*

金烈婦行略

婦人之義以死殉夫斯謂之烈今藍之死也志殉夫也稱之為烈成其志也聊陳梗概播告詞壇惠賜瑤篇俾揚彤管

金烈婦者中翰金孝廉子胞弟蓮西妻也蓮西名殿詔江都人家世孝友代為名儒祖父同日並祀鄉賢詳揚州府志並江都鄉賢錄蓮西幼聰敏博涉經史尤精于莊列頃刻數千言每試輒冠一軍時城東巨族藍翁一俊者兄弟子姪皆有文名翁有第四女端莊嫺淑翁尤寶愛之曰此非凡女子也聞蓮西才遂妻之會吾父病革囑吾弟曰兒



不患不學但讀書要有根柢耳無祿吾父謝世蓮西悲憤  
獨砌一小室中四壁不及一丈日取六經傳註熟復之每  
一經畢輒執卷焚香跪誦父前曰兒某經畢矣誦畢復入  
小室中當是時予兄弟貧乏幾不能自存而蓮西獨鍵一  
小室中斷齏畫粥朝夕無缺者藍氏力居多藍手自鍼紉  
凡所得女紅貲悉以佐讀方其窮愁困憊常作無米炊而  
藍不以爲苦及乙酉蓮西報捷得稍適意矣而藍不以  
自矜布衣麤食從容井臼間自若也歲己丑董吏部視學  
江西謂蓮西曰君兄弟可勿助一臂乎蓮西以予應命時  
予以舊學弟子扳留不能去蓮西遂行中道染疾竟以八

月二日卒於南昌訃至藍聞而仆死而復甦者數次予雖  
勉強自存再三勸慰而藍之死志從此決矣時三子長輝  
甫八歲次章五歲次甲二歲藍撫謂諸兒曰吾不復能顧  
兒吾將從而父地下矣于是日夜哀號惟祝曰我願隨夫  
去夫盍來携我悲慘之聲哀動旁人聞者無不流涕至今  
七年以來哀號不少輟卒以殞命時康熙丙申八月七日  
也去吾弟死之年雖後七年而去吾弟死之日止越五日  
耳嗚呼自古烈婦迫于倉卒殞命于一旦者衆矣若藍者  
蓄必死之志於七年之後曾不少衰卒至殞命而後已者  
亦何其烈哉藍性和緩貞靜寡言咲事叔姑有禮處妯娌



恂退讓歸蓮西僅九年而蓮西在外日多家居偕伉儷者不及三四年而藍卒以死殉之嗚呼悲哉蓮西死後中子早殤督二子最嚴延師訓課一飲一食必親炊之藍死二子哀毀如成人長子輝今十五歲後入學幼甲今九歲庠名帶甲庠名或者蓮西之賫志未遂藍之誓死如歸天之所以酬之者其在二子乎金門詔拔淚書

李母陳太夫人墓表

禮有之曰合葬非古也。自周公以來未之有改也。又曰周公蓋祔。然則祔之禮自周公始矣。今夫聖人制禮本天理準人情。通夫理與情者。從乎古禮也。宜乎今亦禮也。斟酌於古今之間。亦無非禮也。自周公以來。皆以祔為禮矣。其不祔也。禮歟。曰禮也。其宜祔而不祔。是違乎理。拂乎情。非禮也。雖宜祔歟。不可祔而強祔之。是猶之違乎理。拂乎情。亦非禮也。其不可祔而強祔之者。奈何。曰歲月已久矣。道里已遙矣。雖欲祔。不可遷矣。強而祔之。是又違乎理。拂乎情之甚者也。非禮也。若夫李氏之葬。贈都憲廷尉公與其



元配陳太夫人也。君子以為知禮矣。太夫人通州人。前司  
寇敬甫公諱堯曾孫女中丞如岡公諱大科孫女恩蔭官  
生九如公諱遇女年十六來歸。其時廷尉公早孤。祖父宗  
伯公祖母于太夫人。母姜太夫人俱在堂。太夫人不及事  
翁。奉兩世堂上。惟謹。悉能承其歡心。及公成進士。授司李。  
遷給諫。以廉潔稱。太夫人實贊之。九孕皆不育。乃為娶如  
夫人者三。曰吳曰薛曰張。吳安人生一子曰稹。薛太夫人  
生二子曰蘭及都憲公柎。都憲公既貴。陳太夫人乃得與  
薛太夫人俱誥贈一品夫人。都憲公之生也。太夫人歿已  
六年矣。及廷尉公卒。謀所以合葬者。則太夫人之歿已五  
十七年矣。其歿也。厝于上元之黃花堰。雖欲祔不可遷矣。  
無已。乃奉廷尉公衣冠與太夫人合葬于黃花堰。奉太夫  
人衣冠祔廷尉公而合葬于斯。或問之曰。其不祔也。禮歟。  
曰。禮也。其不祔而以衣冠祔也。禮歟。曰。禮也。其祔也。宜乎。  
今也是中乎。禮者之禮也。其不祔也。從乎古也。是變乎禮  
者之禮也。其不祔而以衣冠祔焉。是斟酌于古今之間。而  
權宜乎禮者之禮也。禮也者。本天理準人情。行乎其心之  
所安而已。韓大宗伯慕廬先生。已表于黃花堰之墓。其所  
載廷尉公遺令及太夫人夢中得句語甚詳。且以為李氏  
之於禮也。變而得其正。斯地也。太夫人之衣冠祔焉。今都



憲公之子司馬君炳石等復請予言以表之是故君子以李氏為知禮。

誥授光祿大夫都察院左都御史木菴李公暨元配葉

夫人合葬墓誌銘代

公諱柟字倚江號木菴姓李氏始祖一海公世居句容之朱蓋村數傳至樂易公諱秀始遷興化三傳至文定文定既貴三世皆贈少師文定公諱春芳嘉靖丁未及第第一歷柱國少師中極殿大學士贈太師生容齋公諱茂材公之高祖也以蔭歷太常寺少卿曾祖諱思誠萬曆戊戌進士歷太子太保禮部尚書贈太常公如其官祖諱長祺縣學生前贈刑科給事中父諱清天啟辛未進士歷刑科給事中遷大理寺左丞自公為都憲祖父誥贈如公官祖母



姜嫡母陳生母薛皆誥贈一品夫人陳太夫人無出伯兄  
積吳安人出仲兄蘭及公皆薛太夫人出薛為高郵世襲  
指揮明宇公女既歸廷尉公嘗偕隱于高郵之顧莊生公  
公之生也香自頂出經月不散稍長穎異絕倫就外傳目  
數行下甫九歲能屬文兼工詩崑山崙生葉公一見即曰  
此國器也以女字之既歸識大體主家政公得專心於學  
己酉赴北闈登賢書癸丑成進士選庶常七月扈從至沙  
河乙卯散館

仁皇

帝親試閣中擢第一以卷有水跡易第二授檢討丙辰請  
假省親戊午還朝己未充會試同考官取沈筠楊大鶴李  
孚青等十三人皆名士入翰林者五庚申大學士徐公元  
文薦廷尉公纂修明史以老疾辭公乃手錄廷尉公所著  
書有關明史者呈送史館辛酉陞右春坊右中允癸亥轉  
左冬廷尉公卒于家公以未得親含殮毀幾滅性喪祭一  
秉古禮丁丑服闋赴補己巳四月陞侍講十一月轉侍讀  
進日講官起居注時

孝昭

皇太后葬遵化公與諸御史押武清夫役以往剗羊刺豕  
以勞士卒士卒皆踴躍忘勞苦回游盤山著紀遊詩一卷  
庚午五月陞右庶子掌坊事十二月轉左辛未八月陞侍  
講學士十二月陞內閣學士兼禮部侍郎壬申三月以揚



屬板荒事捧疏御榻前蒙天語垂問乃備陳桑梓流離狀  
得邀恩豁免甲戌充殿試讀卷官五月召試閣學以下諸  
詞臣于豐澤園試豐澤園賦道學真偽論賜御饌御酒於  
竹陰之下越數日試詞臣於乾清宮西暖閣公適奏事賜  
御書臨米元章寫杜甫水閣朝霽詩乙亥六月特用為工  
部侍郎丙子正月奉命祀南嶽時衡方苦旱三月既望入  
廟行裸獻禮祝文甫展甘霖大沛百姓焚香頂額督撫具  
疏入告比復命天顏大悅著有甘雨集其時回經邗江為  
薛太夫人稱觴侍養浹旬親族各分俸以賜十二月命視  
學浙江以御駕親征噶爾旦大捷回鑾獻平北雅詩十章  
命中使引至韻松軒賜御書臨董其昌梅花詩并御書孝  
經一冊丁丑二月赴任途次平原聞薛太夫人暨伯兄訃  
音擗踊長號絕而復甦者再因得心痛疾殞命之由始於  
此矣

仁皇

帝稔其孝賜諭祭以榮之戊寅工部右侍郎員缺特旨補  
授尋轉左以服未闋皆不赴己卯正月聖駕南巡迎至宿  
遷命中使駕小舟與張文貞公同至御舟旁垂詢河工事  
宜將巡視下河公以下河形勢奏聞並陳一望蒼茫生民  
鮮少不足以容翠華遂止次日巡視歸仁堤遙望見公天  
顏遽喜曰此非李侍郎耶命馳騎前玉驄一頭隨行廿餘



里詢堤水原委奏對甚詳又問祖父居何官公舉文定公  
至廷尉公頭銜復詢及兄弟子姪問答盡歡抵揚賜御書  
臨米元章寫杜甫宿左掖詩一首韋應物七言詩句一聯  
且諭曰朕將賜以額公奏曰臣父為前朝耆舊昨于河上  
蒙恩垂問求以賜臣者賜臣父乃書多識畜德四大字面  
諭曰以贈汝父且以汝曾為翰林官也命中使捧至宅并  
御刺書籍數十種頒賜旋命扈從由吳閶抵武林返白下  
回廣陵復賜御製巡歷江南示意五言律及上用龍緞袍  
褂各一襲六月服闋抵京赴任九月陞戶左公自居工戶  
兩部官凡有大興作及勾稽雜事夙夜勤敏錢局爐頭并  
他舖役槩無擾一以潔已愛人為心咸仰其寬和事皆速  
辦庚辰以清口久淤欲移至五家墩議未決乃獨召公問  
曰卿意若何對曰據臣愚見遠移清口不如堅築高堰應  
督令速修高堰逼水刷黃清口既通似不可改又問曰堅  
築高堰泗州被淹奈何對曰淮揚泗州皆赤子臣淮揚人  
祇就淮揚百萬生靈望救之心如此况高堰固而水出清  
口則入海必速泗州亦不至被害

**仁皇帝**大悅命如所奏嗣後分遣重臣督修高堰克奏平成者  
公啟之也其時有敬陳末議以贊堤工疏有請勅督修諸  
臣會議治河全局疏有請陳一得以佐高深疏有參河工



諸臣疏有河工善後疏又有治河議一篇皆治河要策也  
二月與熊賜履等四人為會試總裁中王露等三百名得  
人最盛六月陞左都御史是日九卿會議科場積弊令監  
生回本省鄉試公謂如此則國學空虚千百年大典由此  
廢力爭乃止自後條陳會議切中時弊如請止藩司開列  
以杜虧空請預免下年錢糧以廣皇仁請嚴選河員以杜  
冒濫請昭布爰書以儆無知請慎選刑部司官以全民命  
請就近支放糧餉以便兵民請定會議之法以贊高深請  
飭旗員之外任以慎官方許旗員之贖刑以重國體請禁  
督撫復奏不宜褻體請定巡撫職掌宜循名責實前後疏  
凡數十上屢蒙俞允于刑獄尤加慎重嘗禱于神願為刑  
官得以生人因鐫一小朱記曰活人吾豈能要有此意存  
至是直省刑名日數十每焚香告天祈獄無冤民如福建  
徐氏坐毒死親夫公於原揭中駁出十五可疑

帝嘉

其矜慎且諭中堂當以此為法他如守備楊明揚州張瑞  
生江寧孫元文泰州李開之及貴州陳氏等俱坐重辟情  
罪未協力請並得開活如此類者甚衆是年七月御賜臺  
閣風生額復御製臺省箴公請勒石工既竣復以御書箴  
詞賜之壬午四月賜諸大臣額命各書名進初文定公以  
師儉名堂公以此請遂書賜五月賜院署都俞吁咈額親



金東山文集 卷之九  
加跋語屬公以贊詞亦即以御筆賜之迨祀地壇回宮命  
中堂以下俱集中和殿賜御書公得御製出畿東觀秋成  
五言律八月接駕詢問河工衝決與否並高寶收成公悉  
具奏十月上銓法宜歸畫一疏扈從至德州返癸未正月  
扈從至揚州令公抵家且休沐對曰臣係法司不敢暫離  
二月回至塔灣賜果饌三月回都有扈從詩一卷五月賜  
牙邊金筴御書自製順風志喜七言絕句七月上山東賑  
饑海運最便疏隨差副憲葉公海運賑饑果大有裨益十  
月賜哈密葡萄一本是年遇覃恩公語人曰予官止此矣  
予祖母姜太夫人於前庚辰六月六日含殮時曾祖母于

太夫人伏棺泣謂予父曰汝母膺給諫封應服鴻臚補乃  
用獬豸何耶予父驚視之果然張吻露目光華灼灼今庚  
辰予陞總憲年月日皆同而祖父母果皆邀誥贈非數定  
哉甲申二月命同刑部會審工部事滿漢堂司數十人公  
平情執法萬不獲已始刑訊有欲刑訊堂上官者公曰待  
大臣自有體不可未踰月滿大司空沙公斃于獄公曰前  
若輕置刑將安辭咎耶人服其識工部事畢即會審吏部  
事八月復會審刑部事一年間非詳鞠重案即料檢刑名  
心力俱耗前恙復舉九月以疾告休命以原官致仕十月  
陞辭出都越月抵揚既至家即往謁墓歸與諸昆弟故舊



朝夕言歡甫踰十日而前恙遽作遂不復起卒之日異香徧體經宿不散嗚呼古之至人所稱返本歸真者公其是耶

仁皇帝

聞公之歿哀悼久之賜祭葬自公登朝始終恩遇至死不衰朝野以為榮公居憲長五年一以和平鎮靜總持風紀至臨大事決大疑定大議必不苟同於衆待同寅以恭待各道長以和下至胥吏有小過輒開誠導之無疾言遽色而風度儼然人不敢犯尤喜接引後進自為詞曹即主持風雅如湯君右曾史君申義姜君遴陶君爾稷顧君圖河錢君名世輩俱賞識于未遇時嘗為門人發函與年家子被撫劾論有以公不知為解者公曰若然何以對君與友寧黜何怨隨具疏引咎例議革職特恩留之與人交無城府所謀必以忠或有苞苴輒杜絕弗與通有為蜚語中傷者不與較曰世無醜人羊叔子久自明耳出國門時涕泣祖送者相望於道及其卒也聞者如失所親亦可知公之生平矣公豐頤高準長身玉立性純孝奉二兄友愛倍至遇族中事悉引為己責親戚交游一皆從厚而於師門尤加惇篤其隱德多不欲人知予知之亦不以載成公志也公以忠孝廉潔世其家其教子亦以此為本自公沒後長君炳石已登仕版著績中外有廉能聲其餘子若孫皆



有家法他日所以紹公之訓以上繼九世之業者可于公信之矣公自歷宦途嘗携廷尉公所著南北史註一書日與名儒考訂共若干卷所自著有大遠堂奏議大遠堂文集藥圃詩集俱待刊行世元配夫人葉氏誥封一品夫人崇禎戊戌進士太常少卿諱重華公孫女順治丁酉副車諱方至公女世居崑山母李太夫人明編修諱胤昌公女素嫻禮則詩詞翰墨皆工以故夫人幼秉閨訓通經史精書美其伯父僉憲學亭公叔父大宗伯文敏公皆曰他日鍾郝也及笄歸公盡婦職戊戌副車公卒母李太夫人含痛請于廷尉公乞以公夫婦移家玉峯許之公由是受業

邱近夫之門崑故有觀文社公入社中諸名士皆以赤幟屬公公性豪邁米鹽瑣屑皆不問夫人盡出嫁時裝貲之又念遠離翁姑每躬紡績易佳果珍饈勤中饋問甘毳無缺丙午廷尉公以病亟告倉皇渡江大風颺起舟人皆畏縮夫人許以重貲冒險兼行病亦少間僉謂孝感所致公赴京兆試夫人典鬻以資行裝公已成名擢庶常貧益甚嘗以扈從冒暑回病幾殆篋中止一帚夫人亦質以為醫藥費及告假省親夫人百計經營博堂上歡至廷尉公捐館夫婦南奔極哀盡禮喪葬諸務公不以累兩兄夫人實佐之事薛太夫人尤孝雖遠隨京師必令子若女侍奉太



夫人於家凡獲尚方珍賜必遣人賫獻及太夫人卒夫人在途次搶地呼天百身莫贖未一期特旨補授部咨敦趣受事多謂君命不可却公獨再疏哀辭夫人亦悲痛不忍聞命人目為閨中道學已卯

仁皇帝奉

孝惠皇

太后鑿輿南巡夫人嘆曰吾夫婦受國恩數十年今垂老

矣幸母后鑿輿臨吾境敢不修命婦儀一覲顏色乎遂從公上謁眷問慇懃公為總憲家人有以私事詢夫人者叱曰國家大務我婦人宜干哉惟刑獄重案公每推求至午夜夫人亦從旁反覆端詳務得其可生之路乃喜蓋好生

之誠如一轍云迨公予告卒于家夫人一慟幾絕回念三十年仕宦兩袖清風捧天家所賜賻金感念皇恩益增悲痛凡喪葬事必躬必親四方觀者咸以諸嗣君為能盡禮實夫人之教云初廷尉公為明州司李建祠西湖祀族之仕于浙者公復葺而新之請諸當道春秋祭享載入郡乘并勒御書扁額夫人復請築數楹于玉峯之西麓奉祀廷尉公及副車公以丘近夫配謂父德師恩示子孫永懷勿替云長子孝廉君當需次補中翰猶眷戀宣幃夫人曰經綸重地先文定公暨汝父世職掌之中書秩雖卑亦清華選盍以是纂先業乎遂赴補歷三載遷曲靖司馬去家萬



里夫人屆七旬君紆道省問決意乞養夫人怫然曰汝年踰強仕世受國恩今值邊方要地不思戮力王家以光前烈非孝也况汝有兩弟足以侍吾養矣促就道既至上憲廉其才疊行委署兼數人任又值進平西藏軍興旁午供億浩繁君每念慈訓精神躍然閱六載滇南遠近有神君之頌方欲以是慰夫人志不意夫人凶問忽至悲夫自公去世十八年中兒孫女媳養育教誨之恩百倍于前艱難拮据之狀亦百倍于前而吉凶事無不中禮整如飭如以是為公德配信不媿矣公生于順治四年四月初一日子時卒于康熙四十三年十一月二十日戌時年五十有八

夫人生于順治元年五月十四日戌時卒于康熙六十年七月二十四日亥時年七十有六子三長炳石康熙丁卯舉人內閣中書現任雲南曲靖府同知今丁憂候補次炳緇附貢候選訓導俱夫人出次炳丹太學生側室史孺人出孫男八圮上附貢壻上太學生垣培均增壻圮曾孫二詮訥女四孫女六曾孫女二炳石等卜雍正元年八月初八日合葬于儀真帶子溝去廷尉公塋二里許而乞銘于予予與公同榜進士又同館迄今不見公已二十年每追想遺音典型如在公之生平不能具叙特就其出處之大節以見其君臣遇合之隆及其忠君愛國之意皆由其家



世忠孝學有本原所致凡當代名臣列傳中所當備載者  
畧舉其概誌諸墓以為千百世之根據因掩涕而為之銘  
銘曰

粵稽文定開基相業太常宗伯廷尉世牒洎我都諫忠孝  
代接巍巍一品綿綿九葉公之初生異香滿室彌月不散  
帝賚良弼克岐而嶷四庫淹悉雁塔蚤題花磚以隲天眷  
日隆長親講幄承恩顧問榮遷閣學晉秩司空命祀南嶽  
精誠昭格既優且渥扈蹕南巡雨露均霑司農總憲德意  
弘宣風生臺閣天語高鑄煌煌獬豸三世服焉功成思退  
歸老邗上作表隴阡有光柅鬯童叟懽迎相問無恙山頽  
哲萎溘焉安仰帶子溝前佳城屹屹相望二里堂構髣髴  
帝命藏斯千秋葱鬱繼繼繩繩永為王徽



葉九疇先生墓誌銘

公諱禹臣字九疇號吾然世為汾陽望族嘉靖中湯銘公遷邦卜居闕內教傳至公額其堂曰洪衍今新其額曰椿永即康熙丁亥

上南

巡時親賜御書所稱椿永者蓋謂公也公性誠篤生平言行無鉅細皆一本于誠方少時王師南下衆倉皇奔竄時公在圍城中獨隨兩親牽衣繞膝不少離戈鋌及親挺身捍蔽不少懼雖白刃如雨卒無毫髮損舉室數十人皆無恙稍長即承父勞養盡懽親死哀動旁人逾八十猶思慕不衰同生三人悲兄早死撫孤敬寡終身共爨如一日



三黨中待舉火者甚衆。凡所周卹，皆唯恐人知。聞人急如芒刺在身，必宛轉相濟。然後快，即言浮於事，必立應之。無難色。無德容。有負債者，往往焚其券。家故饒，為熱腸苦。乃鑄約指，銘曰：熱腸以為戒。然耳目偶觸，心復躍然。垂索所不及者，并約指亦投贈矣。嘗遊楚，次烏沙峽，被劫。同舟無遺絲。有世講子某溺于江，公登岸從池陽客，貸百金募善水者。出入波濤，求之三日，夜不得。乃設祭江濱，哭之。同舟者識與不識，皆各分金治裝歸之。無不感激流涕。又挈貲如通州，督竈煮海濱。海巨，熟嚼其貲，率黨白晝劫公。且殺傷人，反誣訐公。公獨不控，亦不訴。曰：吾所恃者天理耳。如盜得志，是福善禍淫之理絕矣。吾何訴？時兵憲李公於舟中焚香誓天，以訊元惡。以下皆款服。是時夾岸觀者萬數，盡懽呼稱神。合坐大辟，絞流者數十人。公嘆曰：天道伸矣。天和或絀，奈何？復籲憲力請止罪，首坐。餘悉寬宥。州之狼山東，舊有范公隄，綿亘二百里，為萬竈保障。即文正公所築也。歲久圯，每颶風至，田廬盡沒，且多死亡。官民皆以工力浩繁為憂。公獨慨然修之，不數月隄遂成。甲寅後，耿逆既平，豫章兩浙婦女多竄江南，或沒入旗。公惻然，乃倡議贖歸完聚者數百人。初河流未定，揚屬疊罹水災，饑民載道，死者相枕藉。公鳩資賑給，饑者食，寒者衣，死者葬埋。各



有法所。時疫癘甚作。公外弟吳景虞精醫。又自解橐中貲。令開局施藥。數年不倦。全活者復無算。公行事皆一根于至誠。無絲髮勉強多類。此又喜談人善。常一事反覆數稱。不厭。如爬煤者之孝。介進士之廉。吳孝廉之節義。濟民先生之醫。詹和尚朱道士之清操。終其身常不絕口。爬煤者不知姓名。以爬煤為業。暮則市酒脯歸。手自捧壺立母側。捧觴以勸。且歌。歌已復取母觴自酌。曰。賜兒一杯。以取母笑樂。夕以為常。母死。棺衾皆夙具。屋數椽。障其中為喪次。囑妻曰。爾主饋我臨喪。自今始無相見也。居歲餘。妻前請曰。夕斷炊矣。爬煤者嗔曰。呼則諾。奈何近喪次。既葬。宿墓

所三年。以孝聞于鄉。鄉士皆欲上其狀。爬煤者笑曰。此人。人事耳。獨我耶。君輩讀書。顧不識此言。畢不知所往。公曰。純孝也。數稱之。介進士名孝瑞。山西人居官清貧。公資之。金不受。固予之。則寓書報曰。貸可耳。他日當還。不然則牛馬償矣。既死。公求其書。懺之不得。常嘆曰。介子廉而信。設果牛馬償。吾負介子矣。嗚呼。世之重財幣。薄友朋。輕信義。背死生者。聞公之風。亦可以愧矣。吳孝廉名拱宸。丹陽人為故明孝廉。易朔數十年。髮未斷也。忌者欲中傷之。乃微剪焉。亦不使刃近膚。孝廉不欲人知。人亦鮮知者。公故亟表之。濟民先生者。亦吳姓。海門茂才。學通博。尤神于醫。先



是公得疾已危。醫者皆嘆曰：無生理。先生至，詳加診視，有頃笑曰：心脉綿長，宜上壽，無死理。未幾果痊。後以試他病者，言人生死悉如響。先生品甚高，公竒其術，尤高其行，故往往樂道之。詹和尚者，吳人，美丰姿，通音律，尤工傳神，親老無以養，挾技遊邗。公客之，有讒詹者，公察其行不疑，將歸，厚以贈。且屬曰：佐爾養，幸勿言以滋讒者。口詹既受，乃揚于衆，頌公德。公讓之，詹曰：愛人之親，而不感者，不仁；受人之惠，而不言者，不義。親死，乃剃度為高僧，嘗四十九夜不交睫，故公喜述之。朱道士字冲陽，亦吳人，固宦家子，幼即棄家，研心元妙。公與同人以千金為治精舍，其他器具

莊嚴悉稱。朱惟一意清修，若不聞者。公益服其人，公之好揚人善，亦皆其誠積于中，不能自己。而此數人者，尤惓惓心口間。而今皆得附公以傳，固公志也。公丈夫子五人，悉能承公訓，賢聲聞四方。四方賢士夫皆以登公堂為幸，雖極顯貴人，爭執猶子禮事公。公固辭不出，必強拜之。由是公父子之名傾海內，動京師。

天子亦聞其名。甲申四月，特召公長男震馳赴闕廷，慇勤顧問，悉稱旨。

上大悅，頒賜饌食，獲茗諸珍品，歸以遺公。丁亥，

上南巡，復詢公齒。甲是歲，公適八十壽，因親灑宸翰書椿永二



大字以賜公。比。鑾迴。復勅內侍李公取上方篋以賜公。當是時也。

君貺益隆。

天恩愈渥。

龍章鶴髮。上下輝映。父子祖孫。稽拜一堂。固千載

之盛。非一時之榮也。向非公之精誠。有以格

天心而邀

帝眷。

其孰使之然哉。孰使之然哉。又二年。乃從容含笑而卒。顏

色如酣睡時。嗚呼。公之生死。豈偶然者乎。公生于前明崇禎元年八月二十三日卯時。卒于康熙四十八年十月二十日巳時。享年八十有二。將以辛卯四月十二日葬公于

城西祖塋之側。諸嗣君屬予誌公之墓。予自維卑且賤。烏足誌公。顧念兒時。即隨先君子及予季父侍公側。今三十年。賓于公家者。今二十年。凡公之言。默動靜。及夫神思氣象之間。纖悉畢具于予之意中。且其贖難拯荒諸節。又皆予先君子及余季父所與朝夕。襄其成者。則予固知公之深者。雖卑且賤。要弗可以不誌。即予之誌公者。亦凡知公者皆能道之。而獨自謂所以盡公之生平。而能闡公之微。以顯其幽光者。固未有愈于誠之一言者也。爰稽首涕泗。而為之銘。銘曰。大哉誠乎。莫永匪天。誠鬱以浮。莫永匪地。誠峙以流。莫永



匪公其誠之升而為星辰之匹。抑就而為河嶽之儔。莊生有言曰。古有大椿者。八千歲為春。八千歲為秋。維予小子亦曰。彼為短而公為修。維千齡萬禩之後。皆曰此大清皇帝之所稱椿永者也。而公又何求。維公子子孫孫永永萬年以承公之休。

上西林夫子書

昨面陳祖塋事。結而未結。心魂靡寧。形諸夢兆。祇緣亟來復師前命。若不萬里遠涉。背負師恩。更何面目以對祖宗。父母。今羣賢四集。通盤籌畫。辦理有餘。倘非要件。關心方擬。終身依倚。何忍一刻暫違。至夢寐渺茫。誠未敢輕信。無如今夜之兆。勝于昨夜情形。更迫必非偶然。仰賴世叔善推師恩澤。及枯骨得以保全。卽隴存歿。均霑世世啣結。設或稍有更張。前功盡棄。再圖恢復。萬有不能妄擬于十二日起程。仰求恩師俯鑒苦情。即蒙允示。必出自高厚之恩。本于矜憫之念。方敢前行。倘有一毫勉強。忽然徑去。上干



師怒則罪愆更大。夢魂懸切。寢食憂惶。含淚上陳。四月六日。


師批。此事即有更張。亦須在尹君去任之後。舍弟猶不足道也。尹君在任。舍弟在南。而一賤卒。即能更張。雖大中丞。亦不可奈何。何異天翻地覆。年兄即在家。遂能一手支撐乎。必之于理。必之于情。事必之于令。先人之厚德。皆斷不至此。日夜懸切。遂擾夢魂。據愚所料。事無十百之一也。况萬里相從。江南所通知。滇黔所通知。今因一夢。便舍我而去。並不能少待。同行。人謂子何。人謂我何。相待忘形。故作此忘形語。倘尊意已定。必不可留。即雲南現有大事。揚州並無小事。亦不必能相強。人各有心。何言怒也。此覆。



再上西林師書

初六日上書蒙師批荅愷切復面諭望前有人入都可附  
 江南書信隨擇吉初七日具有兩稿奉命改訂復擇吉初  
 九日改就又擇吉十二日草家書一紙今擇吉于十五日  
 一併呈上初七之吉成日也成者成其事也成其志也藉  
 師力以圖成功也初九之吉開日也開者開其蔽也開其  
 塞也藉師力以開障礙也十二之吉除日也除者除其奸  
 也除其害也從此除暴以安良也十五之吉定日也定者  
 定其心也定其業也從此定其規模俾祖宗安其靈子孫  
 守其墓世世勿替一定而無不定也祖宗事大邱隴事重





原件短缺

P53-P54



金東山文集 卷之九  
故每舉必擇吉。懇師閱定。即賜下乘。今吉日繕寫。謹再上。

上樓村王殿撰書

蓋聞博物非張華。誰識豐城之氣。空羣須伯樂。乃通冀。櫪之鳴。是故壁號連城。完諸蘭相光。稱照乘珍。自隋侯此榮。莫踰于識韓。而感最深。于說項。恭惟閣下才高八斗。望重三台。宋艷班香。騰蛟龍于筆底。邊便杜庫羅。蚪蚪于胸中。探禹穴之秘書。靡竒不覽。拭龍津之寶劍。所敵無前。甫登博士之場。已無其匹。迨薦明經之席。輒冠其曹。角逐文壇。則鞭撻揚馬。馳驅藝苑。且奴隸曹劉。久擬鵬飛。偏羈驥足。忽杼鳳翼。徧踞鰲頭。則見夫蟾桂初攀。已魁玉筍。曲江旋赴。復弁瓊林。乃淡墨標來。剛羨才郎第一。而泥金報至。爭



看國士無雙。信乎聲價可憑。誰謂文章無據。乃其難者。更有甚焉。蓋虎榜初開。承下風者。尚屬洛陽新貴。龍標雖奪。讓頭地者。非關閩苑仙姿。若夫蓬島詞郎。花磚學士。攤書天祿。誰非吐鳳之才。待詔石渠。盡是生花之筆。揮毫鳳凰池上。爭着先鞭。奏賦鳩鵲觀中。肯居後勁。乃者風和之會。正當月旦之期。視草亭中。盡開琉璃之硯。匣擣文堂畔。同拂翡翠之筆床。惟先生信大手筆。祇見賞花釣魚之賦。更冠羣英。頃令金馬玉堂之賢。共推獨步。在此日鸞波鰲禁。固罕斯儔。即他年鳳閣龍墀。誰出其右。

天顏有喜。

聖眷彌深。拔此身騰一朶雲中。令到處占百花頭上。遡公家派。昔聞狀元試三場。羨君風流。今見龍頭幾四次。豈獨一時之盛。實為千古之榮。詔才漸倚馬。志切登龍。楊修對果之年。已成詩瘦。李泌賦棋之歲。更號書癡。羞讀秦漢以下之書。喜傳羲皇而上之事故。每矚昔之世。渺然百思。間亦覽今之人。慨焉三嘆。竊怪一經之外。常若面墻。百家之編。未經耳食。雖夜復晝。貫動以千篇。而口誦心維。不出八股。解說焉哉者也。便作生涯。拈來甚矣。今夫居然衣鉢。似誦論語半部。盡人可佐太平。但熟孟子七篇。隨地可稱夙老。轉似靈臺無宿物。二十一史俱可束之。不觀休謂海外有奇。



書一十三經皆當存而不論轉陳因之句漫托成宏逞凌亂之詞爭談隆萬甚至官體易位猶然籍口王錢即使首踵倒懸尚復稼名湯許千章一律乃號大家萬口同聲方稱正始畧驅紅腐便謂經妖非用白描即呼鈍賊盈箱插架盡是依樣葫蘆充棟汗牛誰為擲地金石間有筆精之子不過拾慧南華縱稱墨妙之英惟期餽釘文選不則恢詭譎怪竟依稀長吉之詩又或漆績雕鏤則髣髴西崑之體孰是淹今博古任彼馳驅擷芳漱腴供其揮灑者乎幸值

聖天子右文之世廣開士大夫汲古之風偶效楊子之雕蟲忽

遇孫君之相馬加之塗澤一顧而價重千金賜以品題數行而榮踰九錫縷分絲析謂良工之智誠奇歎導郤批知匠伯之思更巧翻覺黃絹幼婦罕譬未工金薤琳琅形容亦拙文非秋水偏類郭象之註莊筆豈春王竟如元凱之釋左惟其才似錦心繡口故隨紙而落語語碎金技善繡虎雕龍致縱筆所之行行積玉遂使枚生七發倏爾聲高幾同平子三都忽焉紙貴此全蛇渡蟻莫喻知己之恩而結草啣環難酬明公之德者也伏願玉鑑常懸冰壺愈朗直鱣堂而校士網四海之珊瑚典鎖院以程才羅三山之麟鳳起衰濟弱桃李盡在公門立懦興頑英雄悉入彀裏



聖主

接沂公嗣響。調宰相之美。上翊  
作新建先聲。跨狀元之竈。下藉即君捧誦梅花之詩。知先  
生安排已久。瞻言槐陰之里。維小子頌禱無疆。

答吳門錢郎書

讀足下詩。突過西崑體多矣。那知錢郎之後。復有錢郎耶。  
可不愧大曆才子家風也。足下高才。不受舉子業牢籠。仙  
風駿骨。仿佛君家若水。但恨未到急流。勇退太早耳。以仕  
代農。依隱玩世。竊為足下不取也。幸圖之。足下來敝郡。不  
能少壯行色。正恐錢庶吉遺錢二十萬。不受足下為清白。  
吏子孫。又豈肯受人憐耶。來教欲謀之某。不知若輩胸  
中。頗有主張。足下峻其崕岬。則彼揮金如土。若放倒一步。  
則又惜土如金矣。故不敢饒舌。一言增足下。話屬也。惟有  
向若輩盛稱足下文章品行。使之自然心醉耳。



婉而多風使見者鄙念自消

宋大中丞壽啓代友人作

銀幡初錫。軍門呈南極之輝。玉律新回。開府敞西池之宴。  
一片祥光。連榮戟重。開火樹之花。百壺清酒。進瑤池猶染。  
醪酥之味。懽騰朝野。慶洽門牆。恭惟閣下。希世祥麟。感朝  
威鳳。第一流人物。上方嘉金筋之褒。兼二妙文才。御苑奪  
錦袍之賜。秉旄都會。三江醉春色。仙桃擁節。雄藩萬戶。聆  
霓裳雅奏。吳山越水。共上春臺。海鶴江鸞。同躋壽域。茲當  
履端之月。正值覽揆之辰。彤牙隊裏。聽新鶯聲聲。如歌五  
福。畫戟堂前。來紫燕呢呢。似祝三多。碧藕冰桃。點綴辛盤。  
餘韭交梨。火棗參橫。甲觀傳柑。香水溪邊。滿載添籌之句。



滄○浪○亭○畔○爭○題○獻○壽○之○詩○豹○節○筵○開○七○郡○歌○長○生○之○調○瑤○池○漿○洒○三○吳○擁○不○老○之○庭○某○根○雖○蟠○李○術○遜○竊○桃○敢○夸○函○谷○青○牛○幸○附○天○中○彩○鳳○叨○從○驥○尾○長○沐○瀛○海○清○波○猥○託○龍○門○徒○羨○瓊○醴○仙○酌○神○馳○絳○縣○稱○觥○竊○效○幽○人○祝○擬○華○封○興○頌○聊○方○魯○國○謹○申○燕○賀○願○切○如○陵○儼○覲○龍○光○遙○抒○獻○曝○如○斯○名○世○壽○民○壽○國○應○五○百○年○似○彼○大椿○為○春○為○秋○宜○八○千○歲○

中丞公駱壇宗匠也不作臺閣語可稱善頌

富平理學孫先生雙壽乞言啟

蓋○聞○惟○仁○斯○壽○正○心○誠○意○即○孔○門○不○老○之○方○得○天○者○昌○達○化○窮○神○乃○儒○者○長○生○之○術○自○虎○皮○之○講○既○輟○號○知○命○者○爭○煉○丹○砂○鹿○洞○之○薪○無○傳○希○假○年○者○惟○研○曇○鉢○以○致○孔○門○之○蔽○塞○長○此○安○窮○且○為○正○路○之○榛○蕪○誰○堪○不○朽○迺○有○富○平○孫○先○生○者○一○代○儒○宗○兩○間○人○瑞○叙○其○宗○派○繫○為○康○叔○之○昭○譜○厥○家○聲○肇○自○樂○安○之○郡○田○何○卒○業○家○有○易○象○藏○書○安○國○齊○名○世○守○春○秋○微○旨○圖○成○無○逸○著○九○經○之○微○言○編○輯○尚○書○垂○鑒○古○之○韻○語○茲○乃○發○祥○關○內○誕○瑞○頻○陽○晏○世○衣○冠○聚○族○倚○岐○豐○之○里○傳○家○孝○友○卜○居○近○花○萼○之○樓○溯○厥○高○曾○不○愧○先○



民○蓄○德○念○茲○皇○考○夙○推○才○子○芳○名○粵○自○太○先○生○當○其○早○啖○  
紅○綾○思○沛○黍○苗○之○雨○誰○知○甫○膺○銅○鈕○旋○來○麥○秀○之○歌○于○是○  
臣○未○盡○忠○思○君○恩○而○罔○報○猶○幸○子○稱○克○孝○讀○父○書○以○紹○聞○  
惟○我○先○生○破○萬○卷○于○胸○中○看○遍○秦○圖○漢○錄○綴○千○言○于○筆○下○  
妙○兼○宋○艷○班○香○富○挾○五○車○散○作○毫○端○風○雨○才○分○八○斗○揮○來○  
紙○上○雲○烟○乃○當○懷○橘○之○年○傷○心○失○恃○及○乎○廢○莪○之○歲○泣○血○  
含○哀○風○木○徒○悲○難○忘○濡○露○雞○豚○不○逮○安○用○椎○牛○遂○自○讀○禮○  
之○餘○惟○務○窮○經○之○學○心○希○二○曲○雪○深○洛○水○之○門○居○隱○九○峯○  
燈○續○延○平○之○脈○于○是○言○能○驚○汗○說○可○解○願○錄○著○根○心○似○朱○  
子○之○析○分○牛○繭○詩○編○全○粟○恍○堯○夫○之○問○答○樵○漁○此○誠○閩○閩○

之○屏○藩○而○洙○泗○之○保○障○也○况○夫○事○難○枚○舉○德○豈○罄○揚○中○路○  
還○金○有○似○香○山○之○帶○窮○途○聞○哭○爰○收○伯○道○之○鬼○教○授○生○徒○  
不○讓○胡○公○之○在○太○學○助○完○喪○娶○何○殊○文○正○之○立○義○田○以○故○  
謝○鳳○荀○龍○踰○躔○庭○下○潘○江○陸○海○吟○咏○階○前○五○鳳○齊○飛○儼○似○  
竇○家○之○桂○一○經○相○授○同○采○魯○泮○之○芹○竚○看○玉○筍○連○班○共○登○  
鴈○塔○遥○知○冰○銜○一○片○同○入○鳳○池○若○夫○尊○闈○張○夫○人○清○河○望○  
族○渭○水○名○門○幼○習○閨○箴○早○述○南○軒○之○訓○長○嫺○內○則○并○窺○橫○  
渠○之○書○迨○淑○女○既○咏○好○述○而○之○子○爭○稱○宐○室○脫○簪○珥○以○供○  
甘○脆○豈○惟○幕○酒○縫○裳○鬻○釵○釧○以○佐○公○車○不○聞○方○底○圓○蓋○丸○  
熊○課○讀○家○傳○柳○母○之○賢○挽○鹿○耦○耕○人○頌○少○君○之○德○此○班○史○



之所罕觀。而彤管之所未聞者也。乃若落桂飄香之日。正值懸弧設悅之辰。天上雙星同曜。清虛之府。人間二老並坐。廣寒之宮。飛靈杵之氤氳。清芬滿座。挹銀河之沆瀣。芳馥盈卮。日月同明。共照鵞湖院裏。椿萱並茂。齊輝安樂窩中。此不獨星嶽之交輝。實為人天之共慶。某等賡謠詎僭。揚扝非誣。追逐文壇。夙仰閔西夫子。馳驅講苑。允欽明道先生。茲宜共濡江毫。同研雲墨。吟風弄月。欣瞻玉兔同光。獻壽稱觴。各奏霓裳。兩曲庶幾剖分造化。同刊太極之圖。贊嘆乾坤。用附西銘之末。

字字是理學雙壽確切工雅無踰斯文

吳門謝貞女徵詩啟

慨自膏劔盟心。慘過衡陽哀雁。奪刀矢志。淒同巫峽愁猿。不朽者名。彤管因標霜操。難全者節。青編為紀冰心。然而杞婦啣哀。猶挽鹿車於數載。貞姜却召。尚齊鸞案於當年。迺有謝氏名媛。東山令女。賦姿端謹。禮度既美。於無愆秉致。幽貞風節。尤欽其不概。王謝之世。姻縱締。何曾帶綰。鴛鴦媿姜之雅配。雖聯並未。衾同鸞鳳。珠沉海底。湘江之竹。淚全斑。鶴別山頭。蜀嶺之鶻啼。盡血守貞不字。較投繯之芳躅。還馨易服。臨喪比桂樹之休風。愈遠抑且持身以儉。衣履鮮綺麗之華。處已惟勤。早夜奏杼機之績。歌蘭咏雪。



不承道蘊家風。繡佛持齋。竊似小娥。廷範甘食。貧而讓產。  
 李孟元之恭順。寧多親築土以成墳。韓子誕之孝思。奚讓  
 此燕足纏絲之姊。難同蕙質路傍刻石之詞。莫罄蘭心者  
 也。伏冀

當代才人。文壇哲匠。或長歌而短詠。以表素心。亦撫事而  
 陳詞。用光青史。

祭劉太守母朱太夫人文代四廣文先生作

嗚呼。中山月冷。白帝摧天。姥之峯崑。嶺霜寒黃。堂隕婺星。  
 之石忽呼天而捨地。鴻音裂孝子之腸。乃倒海以連河。鷗  
 血染仁侯之淚。邗溝十萬戶齊停舂杵之聲。類壁幾千人  
 並輟絃歌之響。聽彼衢悲巷哭。感切蕪城。令我魄駭營飛。  
 涕盈臯比。恭惟太夫人系原沛國。派自文公。叙厥忠勲。猶  
 傳柏臺烏府之舊譜。其孝德曾致赤烏白鵲之徵。華楣不  
 乏達人。人間氣忽鍾閨秀。少嫻內則。續承家禮之書。長習閨  
 箴。祖述考亭之訓。迨夫鳳鳴既卜。祥兆日華。鴈奠迓休光。  
 生天祿。頰繫一筮齋志。薦高魯之堂。榛栗兩筐。婉婉適舅。



姑之所身操井臼儼然鴻案相莊手執酒漿何必鹿車對  
挽諸姑伯姊號曰能賢臧獲奚奴僉稱仁厚溯閩型令範  
堪比少君稽內助鴻勳克相夫子嚮釵佐讀聲騰馮翊之  
壇解佩完婚績著臨汾之署但懷兩袖誰薰官舍之香不  
受一錢豈傳郡齋之物是以四龍堂上人號神君多緣五  
馬閨中家有衆母若夫荀龍繞砌薛鳳盈階篝火熒熒午  
夜進熊連之味寒雞軋軋終宵雜金石之聲荻屢畫而漸  
殘寫作紅牋之字薦幾判而將盡裁成白鵠之衣鳳皇池  
上已許駢肩龍虎榜中還須接踵入參鰲禁既看上苑之  
花出綰虎符但飲邗濤之水昔爲太史今號賢侯董子井

邊擬天人治策歐公楼上比六一風流試聽廿四橋頭人  
歌明月請看萬花園裏士醉春風今某位居屬吏坐列寒  
檀市上三槐遙傍甘棠之蔭堂前四柏時承雨露之霑梅  
花放時叨陪東閣芍藥開後侍從南城鐵心石腸曾和冰  
姿之賦黃腰紫腹分簪金帶之圍乃公忽顧護州而傷心  
使我徒望黍苗而隕涕生芻一束聊抒哀悃之思卮語數  
行難寫帡幪之戴如九原之可作雖于里其非遙  
立言有體代人設身著想憑空結撰寫出一片真懇哀  
思自不可及



祭田姑丈文

代二兄作

嗚呼揚兄弟已不獲見吾姑母矣今更不復見吾姑丈耶  
此不獨吾外兄弟之悲實吾兩家兄弟之不幸也吾家自  
休邑來揚吾祖生吾父兄弟止二人及吾姑母共三人姑  
丈家自晉來揚亦無他兄弟止一人合兩姓言之吾父兄  
弟暨姑丈凡三人吾母娣姒暨姑母亦三人總計之共得  
六人而此六人者分主兩家內外相尚以孝弟相勉以仁  
厚起居必相念飲食必相思有無必相通外侮必相禦疾  
痛疴癢必相關喜必相歡喪必相哭兩姓如一姓也兩家  
之心如一心也吾父兄弟生吾兄弟共四人姑丈生外兄



弟亦四人總計之又得八人向使六人者俱聚于上而八人者俱侍于下雍雍藹藹以共覩其孝弟仁厚之風豈不甚盛乃懽聚者未三十年至丙寅吾伯母年四十三忽見背又十五年庚辰吾伯父年六十四又見背而六人者止餘四人耳又六年己丑吾家則少弟殿詔卒又五年癸巳姑丈家則仲弟有年亦卒而八人者止餘六人耳然當是時四老人者尚康強無恙年皆近八十兩家堂上各有二老每相聚言歡意氣融融甚可樂也亦不可謂不盛歲甲午二月吾伯兄以吾父抱恙憂鬱而卒踰年吾父復以二月見背向之所為盛者已不可復覩矣己亥吾母稱八十觴是年冬姑丈亦稱八十觴又二年辛丑正月姑母復稱八十觴當是時黃髮皤皤三老人各拄鳩杖從容徐步飲食笑言親朋稱觥酬酢進退自如子若孫相與百拜執爵于前士大夫上壽者咸嗟歎為兩姓榮亦不可謂不盛及姑母稱觴後越一月吾母忽見背踰年壬寅四月姑母亦見背是堂上四老人者已去其三獨姑丈存耳則姑丈之身固吾兩家數十年氣運盛衰所係之一人也乃今又忽而病不數日而遽逝嗚呼何天之必欲盡奪之使吾兩家堂上曾不肯遺一人哉其在姑丈年八十四以考終春秋高矣諸表兄弟各竭心力以承其歡孝養備矣孫曾林立



皆克有成四表弟登賢書焚黃有日諸福齊矣獨念夫自今以往吾兩家堂上求一人不可得見而歸而視吾家則所得見者唯兩親之柩在焉出而來姑丈家所得見者亦唯兩親之柩在焉向之皤皤堂上者今安往哉嗚呼是堂上六人者皆相聚于九原之下而吾兩家兄弟笄笄然後何所瞻依也尚忍言哉今薄陳一奠以寫余兄弟之哀思以告于姑丈姑母之靈併使後之人知吾兩家先人情好之篤兩姓如一姓兩家之心如一心子子孫孫其勿替也庶先人之靈其尚不泯姑丈姑母聞予兄弟之言當亦歆然其來格矣乎

豫章祭蓮西弟文

嗚呼吾弟吾弟今乃不復見汝耶吾兩人無一刻不與偕無一事不與共雖偶然離別魂夢之中猶且依々相戀予非弟不能以獨存弟非予亦不能以獨立今予弟忽遭此慘變謂予尚能以獨生耶汝今春自三月晦日從都門歸里以南宮戰罷意殊鬱々不樂居家相聚僅月餘五月十七日遂與毘陵董公同之江西學使者之任別時即叮嚀囑子曰使者性仁厚寡慾弟亦矢志無他庶可相佐有成家報往還跡涉嫌疑一別以後弟誓不復以字來兄毋以弟爲念也予亦深然其言謂此意即可報知已矣遂送之



邗閔分袂舟上其時固忻然無恙也既而予以選事至姑蘇六月初五日返棹忽遇汝於無錫汝急趨吾舟兩人相見喜出意外停舟數語含情而別其時汝雖云畏熱亦猶然無恙也八月初星者豐某以汝字來不及他語但道使者與其兩公子之賢謂信可相佐有成也自此以往雖未嘗不念汝然幸汝之得賢主人亦不復以汝爲慮矣九月初四日雜姊丈忽倉皇自外至涕泣謂予曰弟有變矣予亦不暇問其言之何來亦不自知其魂之何往一痛之餘驚魂仆地茫茫天涯長江千里恨不能奮翼而飛與吾弟一相見也又不知其說之真妄恨不能即至弟前以一決

其疑信也設或有之恨不能訴之神明以起汝於生也設神或聽之恨不能以予之身代汝之死也其時魂散魄飛計無所出及啓視李登之報暨李維二兄之書乃知汝之病以七月六日歿以八月二日卒于荆山叔別駕之署越七日而殯于北蘭寺僧舍嗚呼吾弟吾弟乃忽遭此慘變耶予自聞汝之凶問固自分必死已不復有意於人世汝婦號泣十晝夜未嘗一息聲死而復甦者數次死而幾乎不可復甦者亦數次汝長子帶兒汝之所愛也甫八齡耳哀毀如成人次子章兒甫五齡不解哭汝聞人哭亦哭三子甲兒甫二齡雖不解哭然自前數月來即時聞其長



嘆聲予顧而撫之曰此子氣弱乃爾嗚呼豈知其浩然長嘆者固其動於天者有先乎成人者耶其觸於機者有莫知其然者耶嗚呼以予自念既不容生而俯視諸孤則予又不可死先君子生子兩人不幸早失恃時予十四汝十一予兩人固已知互相珍愛矣又十四年而吾父復見背兩人益相倚為命彼此所期者殊遠且大凡欲遠繼前賢之烈近承祖父之志外以致君澤民而內以惠卹宗族姻婭也其經緯之蟠屈於胸中者惟予兩人獨知不肯一語爲人道恐爲世之所詬厲而竊笑也幸襲祖父之遺蔭叔父母之教育諸昆之友于不至見斥於當世之賢士大夫

而汝又粗有成就且早得三子故予雖困於遇艱於嗣不以爲憂而以予弟之樂爲樂自弟登賢書祖父又皆得並祀鄉賢方謂予兩人志之稍遂者當自此始及予兩人先後遊京師無不爭相引重爲之延譽長安於是進取之志益堅即予弟今之有此行也亦非弟之初願也其始自京師來歸蓋欲爲叔父母稱七十觴耳踰七月仍擬北上從輦下諸公遊迫於使者賢勉應斯役亦謂或可小行其道嗚呼豈知汝之忽遭此慘變耶聞信後雖驚痛欲絕然亦終不忍信豈惟予不忍信即族黨姻婭以及道路傳聞之口亦皆不以爲信其不信者固謂汝萬無宜死之理也且



李登之報謂董公及荆山叔署皆於八月三日先已有函赴告需時日竟未至遂并疑李登素不能書安知其報之非誕妄不足信然既聞其說又恐汝之果卒於異方朝夕之間曾不獲一奠則祀享不備精魄何依是慘益之慘痛增其痛嗚呼尚忍言耶大兄聞信亦自儀奔歸叔父尚不忍使聞也二兄游浙尚不及知也于是次日設位三日成服率汝子奠汝之婦哭汝環顧笑之數齡之子華綵者忽而齊䟽襁褓者忽而斬衰嗚呼此誰氏之孤也為汝兄者尚忍見耶汝婦哭於帷汝子啼於室哀音無日夜不輟於耳嗚呼此誰氏之妻若子也為汝兄者尚忍聞耶其尤有

慘者帶兒謂子曰吾想父之容貌不復得其真奈何章兒謂其母曰母哭父何為者曷不遣人呼父以來嗚呼此情此景為汝兄者尚忍述耶此時欲死不可欲生不能既痛汝之死又恐汝婦之死既恐汝婦之死又懸於汝之柩寸心之內千分萬裂竟不知何所措矣十四日始得董公及荆山叔署中書遂于十五日登舟來奔至十月十一日始到此地嗚呼千里而來僅於野寺頽垣荒烟衰草中相對一柩謂吾所謂骨肉而手足者之在此中也嗚呼為汝兄者尚忍言耶夫為汝兄者且不忍言况汝之當此者又何以為情耶汝嘗以予質弱時以為憂每私以藥為丸



以調攝予之方責汝之無益而妄費及予有疾汝必親爲湯藥以療予且爲予撫摩抑搔恨不能以其手揮予之疾以其身分予之痛今汝疾近一月而予不能一依汝之側爲汝兄者尚忍言耶且汝雖病瘡亦何至自殞其軀搃以舟輿跋涉日無寧晷豈暇調治又以汝兄汝婦皆不在側旁皇無主急於求愈竟至於此向使汝病於家汝婦侍藥於內汝兄調治於外或亦不至此嗚呼爲汝兄者尚忍言耶且念汝病革之時倉皇遽求一覩所親之人而不見欲一吐所欲言之語而不能聞汝此時煩噪異常想其中牢騷抑鬱感憤無聊俱已無可奈何一旦含痛而卒此時

此景更何以爲情耶爲汝兄者尚忍思耶嗚呼語至此予亦不能復言矣其猶有幸者荆山叔嬪克敦族誼董公昆仲喬梓克盡友道毛黃李雒諸君克篤親情贊助於董公之署者又有沈王諸君子贊助於荆山叔之署者又有禹緒大兄及程姚諸君子是以死獲其所殮從其厚歸得其體今卜於十一月朔修佛事三日以招汝之魂于初四日與諸親友哭汝奠汝扶汝之柩以登舟與汝兄同歸嗚呼吾弟吾弟尚其以汝之魂附予之身同歸故里與汝妻汝子相依與汝叔嬪兄嫂及親戚族黨相見返汝之堂棲汝祖父之墓予若得苟延歲月自當與汝共此三子以期其



成立予亦不復以嗣續為意倘或責重難任質弱不勝亦  
得與吾弟相聚九原同埋故土所深願也嗚呼痛哉痛哉  
尚恐言哉弟必有神其聽予言

代友人祭許親家文

嗚呼楊經既逝尚傳潘岳之誄王導云亡爰致却生之弔  
盖一根瓜葛豈惟孔李通家况兩葉婚姻堪比朱陳世戚  
乃一朝其萎魂遊碧落之天忽千里相聞身隔太行之路  
所由顧蕙葭而侘傺淚洒玉樹之風念兔絲以歎歎血濺  
女蘿之露者也恭惟老姻臺高陽苗裔太岳宗潢家傳燮  
理之猷相業久欽蜀漢世紹淵源之學儒宗夙仰懷川緬  
藻鑑于汝南評高月旦溯芳型于江左望重風華甲第連  
雲族號黃山之冠簪纓如雨人夸邗水之雄若夫我公孝  
友性成岐嶷天授斑斕戲綵舞翻萊子之衣花萼名樓香



透。姜。生。之。被。閨。門。嚴。肅。不。讓。叔。恬。堂。構。幽。深。奚。慚。靈。運。志。  
崇。儉。素。何。妨。晏。子。之。澣。衣。性。喜。勤。勞。幾。等。陶。公。之。運。甕。木。  
頭。竹。屑。不。使。遺。棄。人。間。酒。榼。茶。鐺。皆。堪。精。絕。一。世。閉。門。投。  
轄。座。上。多。常。滿。之。賓。饌。玉。炊。瓊。樽。中。有。不。空。之。酒。故。性。同。  
介。石。若。難。望。青。眼。之。看。而。情。似。斷。金。實。常。懸。赤。心。之。照。某。  
夙。忝。婚。媾。世。列。姻。盟。向。慕。阿。咸。兄。子。協。占。于。卜。鳳。繼。述。令。  
女。庸。保。竊。擬。于。乘。龍。閱。閱。相。當。幸。中。屏。間。之。雀。閨。房。增。秀。  
思。貯。金。屋。之。嬌。庶。幾。吟。樂。天。詩。共。居。一。村。之。地。畢。子。平。願。  
同。作。五。岳。之。遊。此。誠。我。兩。姓。之。鴻。休。而。予。一。人。之。私。願。也。  
奈。何。昊。天。不。弔。不。令。哲。人。愁。遺。豈。貝。闕。珠。宮。引。入。華。陽。以。  
去。致。清。風。明。月。恨。無。元。度。重。來。倏。聞。訃。而。傷。心。淚。洒。江。南。  
之。雨。欲。憑。棺。而。躅。足。目。斷。山。右。之。雲。嗚。呼。君。返。天。涯。予。來。  
地。角。但。因。家。兄。作。宰。遂。羈。椰。榆。之。身。敢。令。豚。子。薦。觴。尚。冀。  
馨。香。之。格。

哀悼之中偏寫來如此風雅流麗可泣亦可歌



金東山文集卷之十

江都金門詔東山氏撰  
門人子姪同校

焚黃祝文目錄

焚黃祝文序

焚黃告家廟文

焚黃告祖考覃恩賜贈太史文  
制辭附

焚黃告前祖妣覃恩賜贈孺人文  
制辭附

焚黃告祖妣覃恩賜贈孺人文  
制辭附

焚黃告顯考覃恩贈太史文  
制辭附

焚黃告顯妣覃恩贈孺人文  
制辭附



焚黃祝文序

焚黃祝文序

門詔

荷先世遺澤自秬侯至今六十六傳數以忠孝旌門

閭歷載史冊家譜不暇詳述矣我高祖禹吾公以世家

子篤志好學遍遊名山大川尋訪師友遂以江都學生貢

成均立邦上別業卒歸老故鄉曾祖父母始葬江都方

國家定鼎之初兩櫬在堂邱首未果大兵猝至居民逃散我

祖元亮公跪守柩前我父幼常公甫九齡晨夕伴之

致父子皆先後被繫幾死刃下者數矣卒以神人護免各

送還家閭宅男女數十口無一傷者他戶則積屍相望井

水皆赤唯我舍傍一井潔清自若故遠近皆來取汲咸稱



為孝子井至祖父天性仁厚世守詩書學問經濟師表一時四方就學者甚眾莫不奉為儒宗而皆以諸生老未獲一遇天道有知無知是遵何說哉門詔兄弟惴惴慄慄恐不克勝幸而人心未泯輿論交推我祖我父暨我叔父並祀鄉賢父子兄弟皆得配享我祖父復叨崇祀

勅

建忠義祠天道蓋可知矣今門詔雖粗知自好而學業淺

陋不能紹述祖父之萬一丁酉北闈受知宗伯儀封張

夫子司農鄂夫子有國士之目既又以前館波累固已

甘伏泥塗無復倖進之意乃沐西林夫子培養十餘年

及夫子入相偕桐城夫子交口面

奏保薦史館已慚踰分迨

聖天子

龍飛伊始博採求賢大京兆陳夫子又加特薦附名

鴻儒之科更切惶悚適應試禮闈主司登明選公又得成

進士列詞臣伏念

君恩

師恩愧難報稱而以門詔庸材乃當垂老之年屢膺不

次之拔者非門詔之所敢望也此皆我祖我父世德相承

流風未艾語云不報於身者必昌於後今以

覃恩

榮及兩世故畧陳先德載之祝文並告諸當世以為士君

子忠孝之倡云時

乾隆二年冬十一月廿六日不肖孫男金門詔敬書



焚黃告家廟文

昔我

稔侯受姓啟疆旌曰忠孝翊戴勲長貂蟬七葉世號金張閭

閱遞嬗延晉迄唐黃巢肆燄避地海陽汪溪卜宅聚族蕃

昌祖孫領解甲第輝光宋元暨明簪纓相望洎我

高祖公諱九疇由休寧入江都縣學始志在四方遊學邗上占籍膠庠貢於

成均冠冕六堂遺我書史手澤盈筐亦越

曾祖公諱貴貢為江都金氏祖墓之始道闡而章世德相紹佳城肇祥作塋

西山文定之旁江甘子孫永奉烝嘗於今五世祖列彌彰

孫男門詔備位庶常馳封祖父



綸綍煌煌我心有忝高曾未遑既喜且慙敬告焚黃

繫我

焚黃告祖考覃恩賜贈太史元亮府君文制辭附

祖考至孝格天

曾祖父母雙櫬在前思正邱首歸葬隴阡世籍汪溪高祖父母皆歸

之汪溪寧道路以干經營未遂軍馬喧闐前乙酉四月倉皇

莫措泣血泣然乃掘廳事以窆以埏土絕半掩城潰兵竄

呼號跪守誓死保全空國逃散伴柩而眠兵來加刃注視

往旋疑瘞者金欲伐欲穿叩頭哀告義激辭堅一卒掠去

拷訊貨錢十人並繫疋練同牽以次而戮九人已殲揮刃

將及曾不少延忽有偉人非鬼非僊瞥然而至攘背撲肩



謂子盍去張戟導先衛送及廬麾入而還掉首復返竊為

慮旃後有來者誰復汝憐贈旗一竿門巷高懸過者悚視

畏如鷹鷂偉人別時叩問姓名不肯言再叩合宅保護不

費一弦庭閒戶潔一泓涓涓時因屠城故萬井皆赤此清

且連遠近來汲味勝醴泉井名孝子舊宅在小缺口井在

井驚喜相傳矧其德性醇而不偏矧其學問江涵海淵世

仰儒宗理學真詮賈志未竟運數之愆孫男門詔奉侍無

緣時聆父訓詔述心堅叨承餘蔭濫側史員

今上御極南郊告虔恭荷

覃恩鳳詔駢連馳封錫寵感激肺鑄薰沐膳黃敬列几筵

皇帝制曰寵渥朝章錫類不遺於一命詳開家慶馳恩爰及夫

重闈爾廩膳生員崇祀勅建江都縣忠義祠並儒學鄉賢

祠金玉節乃翰林院庶吉士紀錄三次金門詔之祖父弓

裘衍澤瓜瓞綿麻作述相承再世式彰其祖武淵源有自

一經早裕夫孫謀茲以覃恩馳贈爾為文林郎翰林院庶

吉士紀錄三次錫之勅命於戲舊德弘昭用廣顯揚之志

新綸特賁益增泉壤之光



焚黃告前祖妣覃恩賜贈孺人江太孺人文制辭附

惟

前祖妣歸自無為江本世族閭範式垂結褵未久蕙折空帷

緬想母儀音容莫追今膺

紫誥冠帔遲遲惟神有靈尚其鑒之

制曰禮由義起弘孝治於中閨命自天申賁榮施於大母爾

翰林院庶吉士紀錄三次金門詔之祖母江氏德懋蘭儀

光生槐蔭珩璜作則式垂淑慎之型苻藻流芬丕振光昌

之緒茲以覃恩賜贈爾為孺人於戲鸞書煥采合彤史以

揚休象服增輝荷雲章而永慶



焚黃告祖妣覃恩賜孺人張太孺人文

制辭附

惟我

祖妣世爵前朝賜姓曰張

張公諱鎮本前朝勲臣御賜祭葬世襲錦衣衛指揮勲裔咸

苗配我

祖考淑德孔昭

龍章肇錫翟芾逍遙儀型內則百世不挑

制曰懋績孔昭國憲重五章之命賢聲克纘母儀流三世之

祥爾翰林院庶吉士紀錄三次金門詔之繼祖母張氏婉  
婉承徽柔嘉濟美繼前修而式穀羣推繼室之賢俾後嗣  
之寢昌用啟亢宗之彥茲以覃恩賜孺人於戲沐



殊榮於三錫懿德彌光集繁祉於一堂清芬永劭

焚黃告顯考覃恩贈太史幼常府君文

制辭附

惟我

顯考天性純厚九齡代父請死以救縛之馬上俯首而就拋

置寺前神人交祐僧送還家門庭如舊郡南門外善慶菴

神人曰起起速救孝子乃倉皇啟寺門見馬上繫一童子

乃大呼曰留下孝子兵驚而釋之事定師訪送還家今亦

與廖公春六十而慕連枝並茂與我仲父墳篋迭奏非燕

秋並祀非飲清談達晝暢敘天倫歡動老幼不問治生但知骨肉

道德相規文章共懋七藝游庠風簷立構家世尚書一經

相授遠紹旁搜德新業富屢躋棘闈無怨無疚真誠渾璞

宜仁者壽未報於身或昌於後維予小子粗識句讀忝附



詞臣自慙荒陋匪予之才世德之胄我

祖我

父肯堂肯構既配 黌宮同享俎豆復躋清華以風宇宙仰

瞻白雲陟降左右

皇帝制曰宣猷服采中朝抒報最之忱錫類推恩休命示酬庸

之典爾增廣生員崇祀江都縣儒學鄉賢祠金竒選乃翰

林院庶吉士紀錄三次金門詔之父令德踐修義方夙著

詩書啟後用彰式穀之風弓冶傳家克作教忠之則茲以

覃恩贈爾為文林郎翰林院庶吉士紀錄三次錫之勅命

於戲篤生杞梓之材功歸庭訓丕煥絲綸之色澤及泉臺

焚黃告顯妣覃恩贈孺人羅大孺人文 制附

惟我

顯妣哀哀蒼天我年十四我

母棄捐思

母音容優然在前我

母淑德大哉難言鍾自名族禮教相沿

外祖羅公

公諱士昱字捷明儀徵學生止生母一人豫章派  
辛卯舉人光化知縣諱承祚公之堂妹也

遷蕃衍新安朱陳村連寄籍鑿江邗水家焉與我

祖考同堂共擅倡明理學砥礪後先相攸來歸姻黨交賢贊

我



顯考琴瑟鳴絃借我

叔妣

嬭母郭氏自門詔等失恃與我叔父撫如已出尚未追贈雖有

待後人竊自恨焉

翁好音宣得兒稍晚

母最愛憐雞豚不逮乃薦豆籩翬翟是煌鼗鼓聲淵陳牲奠醴涕泗潺湲

制曰壺教凝祥懋嘉猷於朝宁國常布惠揚休命於庭闈爾翰林院庶吉士紀錄三次金門詔之母羅氏勤慎宜家賢明訓後相夫以順含內美於珩璜鞠子有成樹良材於楨幹茲以覃恩贈爾為孺人於戲昭茲令善之聲榮施勿替食爾劬勞之報遺範長垂

金東山文集卷之十一

江都金門詔東山氏撰

門人子姪同校

江都鄉賢錄書後

江都鄉賢名宦往皆統之郡學嘉靖壬戌縣令趙公訥始於縣學建祠請祀其名宦止董公仲舒王公琪羅公適三人而鄉賢則自應公曜以下至盛公儀凡二十三人載之縣志隆慶初復增入曾公銑凡二十四人自兵燹後兩學神主多已散失國初郡學增置復舊鄭子懋嘉作鄉賢考閔子大臨鄭子譽六修之而縣學闕然康熙乙酉予祖考元亮公暨顯考幼常公父子配享同入賢祠乃請諸



本學夏 唐兩先生悉照縣志增復並現在神主共三十  
六公刊完成錄已吏先叔父聖隣公復相繼崇祀今共三  
十七公後之君子其先人幸得從祀者必宜增修斯錄廣  
布流傳庶俾萬世而下得有所考據不至泯滅云乾隆四  
年後學金門詔敬書

附紀先賢三十七公姓名於後

漢處士應公

公諱曜操履純篤不慕仕進以經術名當世漢初與四  
皓同徵不至時人為之語曰商山四皓不如淮南一老

吳中書侍郎盛公

公諱彥字翁子少有異才年八歲太尉戴昌贈以詩于  
坐答之詞甚慷慨母王氏失明不應辟召躬自哺母婢

使怨母箠撻伺公出炙蟻螬飼母母食而異之以示公  
公抱母痛哭絕而復甦母目豁然復明仕至中書侍郎

唐中書令來公

公諱濟太宗時貞觀進士歷官同中書門下三品及高  
宗欲立武氏為后公切諫曰王者立后以承宗廟母天  
下宜擇禮義名家幽閒令淑者以副海內之望稱神祇  
之意上不從武氏既立銜之尋坐褚遂良黨貶台州刺  
史久之徙庭州龍朔二年突厥入寇公督兵拒之赴陣而死贈楚州刺史有文集行世

唐貞晦先生陳公

公諱融有隱德不出鄉而閭閻化之年七十二卒貞元  
初呂溫寓其邑中見鄉之人父子長幼各有倫序歎曰  
芳蘭所生其草皆香美玉所積其山有光必有賢者生  
于是矣遂停居累日周訪故老果曰嘗有陳某孝慈仁  
信鄉人化之今也則亡清風猶在溫慨然曰貞晦先生  
純德至行沉輝含耀乃披典校德諡曰貞晦先生

唐內史舍人徐公



公諱錯字楚金與兄鉉相友睦同事南唐後主兄以直諫被逐公思念至于失心其母請于李主曰法有兄弟罪及願俱貶以緩其疾後主哀之為召還公病尋愈所著有說文解字韻譜十卷說文解字繫傳四十卷

宋太子少師張公

公諱方平字安道少穎悟絕人凡書一閱終身不忘仁宗天順間舉賢良方正使契丹契丹主聞其名親酌玉卮飲公顧左右曰有臣如此佳哉以所乘馬為贈為御史中丞中外之事知無不言出鎮西蜀會轉運使攝守事有印部川妄言廣源州蠻儂智高在南詔將寇蜀攝守大驚移兵屯邊郡發民築城日夜不休民大驚擾朝廷聞之發陝西步騎戍蜀兵仗絡繹于道詔促公行言南詔去蜀二千餘里道險不通安能舉大兵為智高寇我哉此必妄也臣當以靜鎮之乃下令邛部川悉撤屯兵罷城築之役會此觀燈城門通夕不閉蜀遂大安已得邛部川之始為此謀者臬首境上南蠻大震英宗不豫召公至福寧殿草制上憑几賜公坐言不可辨出書一幅八字曰福寧殿草制上憑几賜公坐言不可辨穎王也嫡長而賢公進筆請書其名上力疾書之以付

公及事神宗論事益切曰老臣且死見先帝地下有以藉口矣上為感動舉蘇軾蘇轍世以為知人卒謚文定

宋樞密直學士贈禮部侍郎呂公

公諱溱字濟叔仁宗寶元元年戊寅狀元進知制誥為翰林學士疏宰相陳執中奸邪仁宗還其疏公曰以翰林學士是陰中大臣也願出示執中使資善堂詔曰此為鄉設宜盡醉自今由經筵出者視為例徙成德軍時公請罷之塔河宰相主其議歐陽修力疏其不可會地震誣劾之下大理皆欲置公死上稔知公詔使李參素嫉公屢進龍圖閣直學士改樞密直學士年五十五卒贈禮部侍郎神宗悼之詔曰溱立朝最孤知事君之節絕跡權貴故中廢十餘年人無言者方擢領要淹忽淪亡家貧子幼必至狼狽宜優給賻禮官庀其葬以勵臣節

宋顯謨閣待制贈銀青光祿大夫孫公

公諱藝字叔靜用父任調武平尉趙抃薦其才知偃師縣徽宗初召為屯田員外郎公微時與蔡京善常言蔡



子貴人但才勝德恐貽天下憂至是京還朝途遇公謂  
 曰我若節儉以先百吏而絕口不言兵天下幸甚  
 主示節儉以先百吏而絕口不言兵天下幸甚  
 者京既相遂出公提點刑獄及進戶部郎中復以疏忤  
 京徒開封尋以顯謨閣待制知曹州再徙鄆州邑人為  
 草祭之謠指切不復仕公復在廣東時蘇軾以他事  
 宮知單州遂不復仕公復在廣東時蘇軾以他事  
 之善二子娶晁補之黃庭堅女時黨事起家人皆危懼  
 公一無所顧時論稱之八年十  
 六卒贈銀青光祿大夫諡通靖

宋徽猷閣待制王公

公諱昂徽宗政和八年癸亥狀元除秘書省校書郎高  
 宗即位遷起居舍人秘書少監時御府頒書籍四百九  
 十種曾收家藏書二千六百餘卷公分經史子集四  
 庫校售脫誤以別本叅攷書成除徽猷閣待制知台州

宋史館修撰王公

公諱居正字剛中徽宗宣和三年辛丑進士第二范宗  
 尹薦其直諒孝友召對便殿條仁宗聖訓十事以獻上

悅撫州守進甘露圖公請却之上方嚮規諫公纂集諫  
 十五卷開廣上意知婺州貢羅主歲責輸五萬疋公手  
 疏五不可聞轉運使移供御炭胡桃紋鶉鴿色公力  
 論止之屢官中書舍人兼史館修撰後忤秦檜落職十  
 年檜死復故職其學根究六經初熙寧中王安石以新  
 經義頒天下公以崇是闢非為已任黜王氏說淫龜山  
 楊氏出所著三經義辨示公曰吾舉其端子成吾志公  
 遂為毛詩辨學十三卷詩辨學二十卷周禮辨學五卷  
 辨學外集一卷上之三卷與龜山義辨皆列秘府二書既  
 行天下不復言王氏學所著又有竹西集西垣集

宋敷文閣待制李公

公諱易字順之高宗建炎二年戊申狀元公以二帝蒙  
 塵辭闈喜宴從之授江陰軍判官會金人犯江陰守臣  
 胡紡曰吾曹義當死城郭君有母宜亟避之公告其母  
 母曰我去汝必無堅守志死生當共之既而金人知其  
 有備遂引兵去時因兵火之餘宗正寺所掌四書曰玉  
 牒曰仙源積慶圖曰宗藩慶繫圖曰宗支屬籍皆已散  
 佚公請為編次後直秘閣知揚州  
 以本貫辭不許官至敷文閣待制



宋秘閣修撰李公

公諱衡字彥平高宗紹興十五年乙丑進士知溧陽縣專以誠意化民夏秋二稅先期榜縣門鄉無吏跡而輸送先他邑擢監察御史外戚張說以節度掌兵柄公力疏其不可廷諍移時除起居郎公曰與其進而負于君不若退而合于道章五上請老知不可奪復以秘閣修撰致仕時給事莫濟不書勅翰林周必大不草詔右正言王希呂亦相繼論奏同時去時為四賢詩以紀之史謂其進退雍容幾于聞道著有論語說易義海諸書

宋寶章閣待制牛公

公諱大年字隆叟寧宗慶元二年丙寅進士歷任州縣以廉敏稱通判真州權知泰州廉介寡欲在郡繕鎧甲增料錢以優恤郡兵會大水以私帑賑民及還朝惟舉僮荷橐而行累遷工部侍郎不拜以集英殿修撰提舉太平興國宮以餘俸置義庄家無餘財上以其清苦特除寶章閣待制著有支山集行世

元孝子李公

公諱茂世為大名人徙江都性篤孝母孟氏嘗病目失明公禱于泰安山三年復明元成宗時大德九年縣中災延燒千餘家火及公廬風返而滅有司以聞特賜旌表又祝母壽每夕籲天乞損年以益母母果踰八十

明陝西左布政陳公

公諱琰字公信洪武初御史嘗按雲南每出入凝顧院東一民家烟樓一西日召其家督錮之後堂遣人給取其家文券閱之有江西販商路引一角乃出訊其人曰奈何于庖所殺某販商而取其貨乎其人即伏罪公因言出入時見烟樓中若有取手招以訴者遠近以為神後轉陝西左布政有惠政以忤藩王歸詳陝西名宦傳

明雲南澂江府知府張公

公諱冕字汝端天順三年己卯舉人授台州府同知衙署清肅直謁無敢入後歸僕誤持官衙二釜至中途公覺亟返之遷澂江知府搽履無異台時解組家居蕭然壁立轉運使畢亨稔其清苦餽之金固辭不納

明湖廣攸縣知縣張公



公諱曦字景芳天順六年以貢士授長沙府攸縣攸俗  
侈而民頑公崇儉素一切導以躬行夸靡之俗為之一  
變尤留心恤民徭役不給者悉罷之民大稱  
便乞歸數年百姓追思不輟為立祠奉祀焉

明福建泉州府知府馬公

公諱岱字伯瞻成化元年丙戌進士初授戶部主事出  
知泉州府泉民有數世不葬其親者公至諭以禮旬月  
葬以千計僧以尼為下院公罪其尤者餘以配  
民風俗一變以內艱去任行李蕭然民不忍害

明戶部尚書贈太子太保高公

公諱銓字宗選成化五年乙丑進士初授臺諫時黃河  
退地千餘頃為藩王所據上命公與中官往按公議還  
民中官受王賂以危言脅之公不為動竟如其議巡撫  
保定時有奸民獻民地為皇莊者公奉命勘實亦還其  
地於民累官戶部尚書公立朝務持大  
體居鄉則溫厚好禮卒賜祭葬贈官保

明廣東叅政左公

公諱唐字克卿弘治九年丙辰進士授戶部主事出為  
廣東叅政政治事嚴明吏多怨之會查盤省藏官至史証  
以贓乃拊膺曰平生砥勵名節顧若此不食而卒撫按  
藩臬知公冤交奏雪之性孝友廉介比喪歸裝橐如浣

明兵部尚書王公

公諱軌字載卿弘治十二年己未進士授戶部主事監  
崇文門稅司禮太監蕭敬家奴隱稅公執而訊之時劉  
瑾怙權每使臣還必以賂見公獨不往後巡撫四川以  
平苗功累進戶部左侍郎總督倉場請罷京通二倉太  
監及重開惠通河皆國家大計後世賴焉會太倉草場  
災公上疏自劾且勸上修德以回天意歷陞兵部尚書  
隆慶中諭賜祭葬公性至孝為諸生  
時父病思食柿不得遂終身不食柿

明刑部侍郎贈右副都御史葉公

公諱相字良臣弘治十五年壬戌進士初授金華司理  
擢給事中時逆瑾擅政勢傾中外公首疏其奸後以疏  
忤伏鸞出叅貴州會芒部構亂公討平之擢戶部侍郎  
尋以病予告起補刑部侍郎卒賜祭葬贈右副都御史



明太僕寺卿盛公

公諱儀字德璋弘治十八年乙丑進士觀吏部政劉瑾以事干尚書屬公致書公不許遂知名授監察御史時文體日靡請崇尚濂洛之學以清峻著撰維揚志二十卷解馬法至今著為令歷官以清峻著撰維揚志二十卷

明總制三邊贈兵部尚書曾公

公諱銑字子重嘉靖八年己丑進士初授長樂令擢御史巡按山東平亂遼陽上以公有邊才遷山東巡撫復簡三邊總制屢建大功疊膺重賞公感上知遇益思自奮矢忠報國條上數事一曰定廟謨二曰立紀綱三曰審機宜四曰選將材五曰任賢能六曰定芻餉七曰明賞罰八曰備長技慷慨數千言願以身任上甚壯之再條邊務十八事復上營陣八圖皆詔賜旌褒時咸寧侯仇鸞驕恣悖逆陰洩事機公劾其狀逮繫詔獄會嚴嵩方謀傾首相夏言鸞因重賂嵩乃劾公開邊啓釁夏言和告變流言布滿宮掖震驚嵩乃劾公開邊啓釁夏言和同附公遂奪言職遣緹騎收公羅織成獄刑于東市公死家無餘貲天下冤之隆慶中給事辛自修御史王好

問疏公志在立功身罹重辟知與不知皆深痛悼詔復兵部侍郎副都御史加贈尚書諡襄愍賜祭葬及子孫官蔭天

明福建左布政李公

公諱承式字敬甫先世大同人嘉靖三十五年丙辰進士初授錢塘令擢兵部武選郎中上封事八條俱報可出備兵榆林法令嚴整壁壘一新遷陝西布政以疾歸會倭犯朝鮮以公有邊才召用立軍功陞福建左布政

明右僉都御史贈兵部右侍郎李公

公諱植字汝培敬甫公子萬曆五年丁丑進士授翰林庶吉士改江西道御史時巨璫馮保橫恣朝臣無敢言者公抗疏劾保十二大罪同列聞其事至噤汗反走夜半忽傳旨逐保籍其家至巨萬他珍稱是上以盡忠言事稱之超拜太僕少卿尋以爭壽宮貶知州復遷大理寺丞累官至右僉都御史卒贈兵部右侍郎賜祭葬

明贈按察司僉事陳公

明贈按察司僉事陳公



公諱輔堯字九室號華山萬曆十六年戊子舉人初令長寧廉聲噪一時舉天下治平第一擢膠州守時遼左用兵遣公往瀋陽查馬事未竣而遼陷左右諷之去公曰守社稷者死社稷守封疆者死封疆吾理芻馬即吾義乎拔佩刀自剄而死詔贈按察司僉事諡忠烈

明吏部稽勲司員外郎王公

公諱納諫字聖俞號觀濤萬曆三十一年癸卯解元時陶望齡主試王思任分校得人最盛丁未成進士授行人使榮藩辭樂却餽榮世子敬禮之擢吏部歷四司以疾告歸于書無不讀原本六經有會心言四書翼註易經家訓初日齋文集及所選老莊左國管韓荀子淮南蘇文等集行世

明陝西道御史巡按雲南李公

公諱柄字明衡敬甫公子天啓二年壬戌進士初任內府中書考授監察御史巡按兩浙修築海塘頌聲載道崇祀名宦繼按雲南撫綏普首邊郵永定勤勞著績終于王事

清湖廣布政司叅政陳公

公諱卓字懋修順治四年丁亥進士除刑部主事遷員外旋進郎中畿內有州民訴長吏橫斂過額者州守懼改竄其部誣民以叛公劾其狀坐守以法遷四川學副先是蜀為賊盤踞士竄匿不治經史公至出所携經書命諸生轉相傳寫逾年而絃誦之聲遍野再遷臨鞏兵備道公疏陳邊防請增兵屯葺堡障復遷湖南叅政

清誥贈奉政大夫禮部郎中程公

公諱銓字文衡太學生性敦慎然一言相投契便傾身接之客過其廬者輒張樂置酒極歡而去家無多財饋粥遍期功卒之日戚友隣里皆哭以子濬中丙辰進士贈中書舍人復遇覃恩加贈奉政大夫祠祭司郎中

清誥贈中憲大夫黃州知府許公

公諱承宗字念修性至孝母卒時家猶苦貧貨數百金具杉棺以葬同產三人弟承宣承家少有才名公綜理家務佐其讀書先後俱成進士入館閣同為名臣及公卒兩弟寢食喪次哀感旁人公好利濟凡施棺施藥賑

王觀濤四書翼註行世



米賑粥給錢給衣及修橋設渡養老育嬰之類終身不  
倦由國學授縣令舉鄉飲大賓以子錫齡贈黃州知府  
清勅授文林郎工科掌印許公

公諱承宣字力臣號筠菴康熙十一年丙辰進士授翰  
林庶吉士遷工科給事中慨然曰言事自近者始因條  
奏揚州水利賦役二疏皆切中時弊辛酉典試陝西取  
范光宗等四十人皆知名士試竣道經秦晉以兵燹後  
民氣凋殘疾苦特甚公手陳六疏皆與利害之事又  
請廣興文教頒修學宮章奏甚衆彙為金臺集十卷忠  
論慨切聲震諫垣及予告歸里捐資修學宮墻煥然拯  
災恤患鄉里賴之公在朝在野皆實心圖治嘗手書屋  
壁云十二時中無欺已三千里外  
不忘君此可想其忠愛惓惓云

清勅贈文林郎翰林院庶吉士紀錄三次廩膳生金公

公諱玉節字元亮號素菴乙酉城陷兩親柩未及葬穴  
室中地瘞之兵至疑所瘞者金也欲啟視公曰吾身可  
萬斷吾父母柩不可故兵怒欲斫之其子請代得免繼  
又一卒至將戮公忽有偉丈夫從屋躍下叱卒去送之

還家且從靴中出一小旗揮門上曰可保無患矣及後  
他卒至皆望旗退避是以金氏男女數十口無一傷人  
謂純孝格天云兵燹甫定逃民復業城中井皆屍積井  
水盡赤遠近皆赴金氏取汲稱為孝子井其井在小缺  
口朝東金氏舊宅其時有少婦丰安美異從室中出曰  
逃亂至此乞相依為命公令家人接之如賓積數年未  
嘗一及於亂後得其夫令携歸夫妻感謝而去嘗館史  
姓家積金數十封密藏公書笥中及史罹於難公檢  
書得金召其家還之其家願分半以酬公固辭不納公  
生平主敬存誠不欺屋漏自少食餼即以理學為已任  
集同志劉冀鏞等十一人會講董子祠及王心齋先生  
祠學者翕然宗之一時經明行修之士悉出其門下學  
使聞其賢兩舉優行詳郡志理學孝子二傳著有四書  
解十六卷小學闡證十卷批點性理四十卷以家孫門  
詔中乾隆丙辰科進士  
覃恩賜贈文林郎翰林院庶吉士紀錄三次  
清勅授文林郎昆明縣知縣張公

公諱瑾字子瑜號滌園康熙二年癸卯經魁生十二歲  
而孤事母至孝母卒嘔血數升與弟琰相友爱同受業



元亮金先生之門先生知其有經濟才及庚午授昆明  
 令為雲南省會劇邑賦稅繁重蠻獠雜處號為難治公  
 到任之日即革除公費歲省民數千緡首請緩征三月  
 因得詢民利病化鋤奸暴拯貧窮助婚喪惠政頻多三  
 賦均徭不與教民疾苦雖南楚夜郎無不仰若父母忽一  
 夕卒於官傾城數萬人奔哭易箆所甚有列名焚黃願  
 減已算祈神返魂者既已無可奈何乃畫像立牌無不  
 家尸奠及奉命馳驛歸葬滇人志崇祀名宦  
 走送數十里哀聲震天載雲南郡志崇祀名宦

清勅贈文林郎翰林院庶吉士紀錄三次增廣生金公

公諱奇選字幼常號繩菴玉節公長子乙酉城陷其父  
 跪守親樞兵至欲殺之時公方九歲涕泣奪刀曰願殺  
 我勿殺我父卒瞑目曰小兒不畏死耶竟掠之去道經  
 城南善慶菴有老僧監和夢闕帝曰有不可殺之子被難  
 汝亟救之僧驚起逆謂卒曰此小孝子不可殺卒愕然  
 投之去僧乃送還踰二日父卒哀毀骨立舌耕供母  
 一旬極孝終歲伴母榻前與弟彥選共爨六十餘年如  
 一日妻羅氏奉姑至孝羅早死終身不更娶於書無不

清邑增廣生金公

讀尤攻孝經小學性理三書其學務以立誠為本與人  
 相對如渾金璞玉蹊蹊悉化門人子弟為輯其事之日  
 於鄉黨曲禮者凡數十條編曰孝安先生傳燈錄歿之日  
 者皆哭泣失聲相與私諡曰孝安先生公才思灑瀚下  
 筆輒數千言以七藝遊庠數奇不遇僅補增廣所著有  
 孝經闡證十卷性理纂言四卷禮記分類全書三十卷  
 以冢男門詔中乾隆丙辰科進士紀錄三次其次男殿詔  
 恩勅贈文林郎翰林院庶吉士紀錄三次其次男殿詔  
 中康熙乙酉科舉人院庶吉士紀錄三次其次男殿詔  
 授內閣中書舍人

公諱彥選字聖鄰號少嵩玉節公次子奇選公胞弟生  
 而英異稍長即以天下為己任應梁學使試以第一  
 入泮自此屢試必高等每科闈牘出鄉先輩皆以元魁  
 許之榜放不第人皆以為為譁公獨曰命也何尤唯於濟  
 人利物之事視若切膚遇有水旱飢溺兵燹災荒流離  
 載道輒之日夜經營不使盡得所不休如丁巳京口西  
 掠入旗之民則贖之已未高寶等處遭水厄之民則賑  
 之庚申飢荒凍餒欲死之民則衣食之皆公為首倡立



義匣、建存古堂、鳩集諸好善之士、合力共勦、撰善過格、闡證三十卷、公與兄奇選公、日為講論、勸誘一時、歡興、踴躍、凡有義舉、靡所不為、難公悉數、天性孝友、撫兄子、如己子、使兩姪得成、名者皆公之九子、若孫均有文、名、僉知其後必昌云、公年七十、六娶郭氏、有賢德、年八、十二、家風忠厚、孝友、鄉人舉以為法、所著有正學微言、集庸行類、編等書、

金東山文集卷之十二

江都金門詔東山氏輯

門人子姪同校

蘭亭圖畫跋

附全刻

蘭亭集羣賢姓氏考

蘭亭集詩總目

蘭亭集詩目錄

蘭亭集敘一首

蘭亭集詩三十七首

蘭亭集後敘一首

蘭亭帖集說上







王宿之

鎮軍司馬虞說

府主簿后綿

任城呂系

參軍孔盛曹文之

參軍鎰密

王玄之令孫慈

王彬之

郡五官謝繹

王徽之

府功曹勞夷

行參軍徐豐之

前長岑令華者

徐州西平曹華

王蘊之

鎮國大將軍卞迪

司徒左西屬謝萬

上虞令華茂

任城呂本

彭城曹諲

上陰令虞谷

中軍參軍孫嗣

陳郡袁嶠之

行參軍王豐之

以上次序悉依蘭雪軒石刻圖。



蘭亭集詩總目

詩兩篇成。

王羲之、王凝之、孫統、謝安、孫綽、  
王宿之、王彬之、王徽之、徐豐之、謝萬、  
袁嶠之、

詩一篇成。

魏滂、郗曇、桓偉、庾友、王渙之、  
曹茂之、庾蘊、虞說、王玄之、謝繹、  
曹華、王蘊之、華茂、孫嗣、王豐之、  
詩不成、飲酒三觥、



謝藤、謝瑰、邱旄、任凝、王獻之、  
楊模、后綿、呂系、孔盛、鎰密、  
勞夷、華耆、卞迪、呂本、曹謹、  
虞谷、

蘭亭集詩目 共二十六人。

魏滂 五言八句一首

王羲之 四言八句一首 五言八句一首

郗曇 五言四句一首

桓偉 五言八句一首

王凝之 四言四句一首 五言四句一首

庾友 四言四句一首

王渙之 五言四句一首

孫統 四言八句一首 五言八句一首

謝安 四言八句一首 五言八句一首



曹茂之

五言四句一首

孫綽

四言八句一首

五言八句一首

庾蘊

五言四句一首

王宿之

四言四句一首

五言四句一首

虞說

五言四句一首

王玄之

五言四句一首

王彬之

四言四句一首

五言四句一首

謝繹

五言四句一首

王徽之

四言八句一首

五言四句一首

徐豐之

四言四句一首

五言四句一首

曹華

五言四句一首

王蘊之

四言四句一首

謝萬

四言八句一首

五言八句一首

華茂

四言四句一首

孫嗣

五言四句一首

袁嶠之

四言八句一首

五言八句一首

王豐之

四言四句一首



蘭亭集叙

王羲之

永和九年歲在癸丑暮春之初會于會稽山陰之蘭亭脩  
 楔事也羣賢畢至少長咸集此地有崇山峻領茂林脩竹  
 又有清流激湍映帶左右引以為流觴曲水列坐其次雖  
 無絲竹管絃之盛一觴一詠亦足以敘暢幽情是日也天  
 朗氣清惠風和暢仰觀宇宙之大俯察品類之盛所以遊  
 目騁懷足以極視聽之娛信足樂也夫人之相與俯仰一  
 世或取諸懷抱晤言一室之內或因寄所託放浪形骸之  
 外雖趣舍萬殊靜躁不同當其欣于所遇暫得于已快然  
 自足不知老之將至及其所之既倦情隨事遷感慨



金東山文集 卷之十二 六  
係之矣向之所欣俯仰之間以爲陳迹猶不能不以之興  
懷况脩短隨化終期于盡古人云死生亦大矣豈不痛哉  
每攬昔人興感之由若合一契未嘗不臨文嗟悼不能喻  
之于懷固知一死生爲虛誕齊彭殤爲妄作後之視今亦  
由今之視昔悲夫故列敘時人錄其所述雖世殊事異其  
所以興懷其致一也後之覽者亦將有感于斯文

右王羲之脩禊契帖爲古今書法第一。自唐以來摹搨  
相尚各有不同。而傳之久遠者惟石刻存。故後世有定  
武褚遂良諸家。不啻數十本。贗者尤衆。惟以定武本爲  
逼真。其他亦有可觀者。予閱之頗多。今以定武本三褚

遂良本一。唐模賜本一刻之于石。復書諸賢詩。倣李伯  
時之畱。兼禊帖諸家之說。共爲一卷。讀書之暇。惟自以  
爲清玩。非敢遺示于人。以爲楷式也。永樂十五年歲在  
丁酉。七月中澣書。蘭雪軒東書堂圖書記。



下百... 蘭亭集詩... 郡功曹魏滂... 三春陶和氣... 德音暢蕭蕭... 右將軍王羲之... 代謝鱗次... 同流迺携齊... 仰視碧天際... 造化工萬殊... 散騎常侍郗曇

蘭亭集詩

郡功曹魏滂

三春陶和氣。萬物齊一歡。明后欣時豐。駕言映清瀾。疊疊德音暢。蕭蕭遺世難。望巖媿脫屣。臨川謝揭竿。右五言

右將軍王羲之

代謝鱗次。忽焉以周。欣此暮春。和氣載柔。詠彼舞雩。異世同流。迺携齊契。散懷一邱。右四言

仰視碧天際。俯瞰淶水濱。寥閭無涯觀。寓目理自陳。大矣造化工。萬殊莫不均。群籟雖參差。適我無非親。右五言

散騎常侍郗曇



溫風起東谷。和氣振柔條。端坐興遠想。薄言遊近郊。右五言

滎陽桓偉

主人雖無懷。應物貴有尚。宣尼遨沂津。蕭然心神王。數子各言志。曾生發清唱。今我欣斯遊。愜情亦暫暢。右五言

王凝之

莊浪濠津。巢步穎翁。真心真寄。千載同歸。右四言

煙煴柔風扇。熙怡和氣淳。駕言興時遊。逍遙暎通津。右五言

穎川庾友

馳心域表。寥寥遠邁。理感則一。冥然斯會。右四言

王渙之

去來悠悠子。披褐良足欽。超跡脩獨往。真契齊古今。右五言

前餘杭令孫統

茫茫大造。萬化齊軌。罔悟云同。競異標旨。平勃運謀。黃綺隱几。允我仰希。期山期水。右四言

地主觀山水。仰尋幽人踪。回沼激山逵。踈竹間脩桐。因流轉輕觴。冷風飄落松。時禽吟長澗。萬籟吹連峯。右五言

琅琊王友謝安

伊昔先子。有懷春遊。契茲言執。寄傲林邱。森森連領。茫茫原疇。迥霄垂霧。凝泉散流。右四言

相與欣佳節。率爾同褰裳。薄雲羅景物。微風翼輕航。醇醪



陶丹府。兀若遊羲唐。萬殊混一理。安復覺彭殤。右五言

行叅軍曹茂之

時來誰不懷。寄散山林間。尚想方外賞。超超有餘閒。右五言

左司馬孫綽

春詠登臺亦有臨。流懷彼伐木宿。此良儔。脩竹陰沼掇瀨。縈邱穿池激湍。連濫觴舟。右四言

流風拂狂渚。停雲蔭九舉。鶯語吟脩竹。遊鱗戲瀾濤。携筆落雲濤。微言剖纖毫。時珍豈不甘。忘味在聞韶。右五言

穎川庾蘊

仰想虛舟說俯嘆。世上賓朝榮。雖云樂夕斃。理自因。右五言

王宿之

在昔暇日味存林。領今我斯遊神怡心靜。右四言古

嘉會欣時遊。豁爾暢心神。吟咏曲水瀨。淥波轉素鱗。右五言

鎮軍司馬虞說

神散宇宙內。形浪濠梁津。寄暢須臾歡。尚想味古人。右五言

王玄之

松竹挺岩崖。幽澗激清流。消散肆情志。酣暢豁滯憂。右五言

王彬之

丹崖踈立葩。濛映林。淥水揚波載浮載沉。右四言

鮮葩映林薄。游鱗戲清渠。臨川欣投釣。得意豈在魚。右五言



郡五官謝繹

縱暢任所適。回波縈游鱗。千載同一朝。沐浴陶清塵。右五言

王徽之

散懷山水。蕭然忘羈。秀薄粲穎。踈松籠涯。遊羽扇霄。鱗躍清池。歸日寄歡。心冥二奇。右四言

先師有冥藏。安用羈世羅。未若保冲真。齊契箕山阿。右五言

行叅軍徐豐之

俯揮素波。仰掇芳蘭。尚想佳客。希風永嘆。右四言

清響擬絲竹。班荆對綺疏。零觴飛曲律。歡然朱顏舒。右五言

徐州西平曹華

願與達人游。解結遨濠梁。狂吟任所適。浪流無何鄉。右五言

王蘊之

散豁情志暢。塵纓忽已捐。仰詠挹餘芳。怡情味重淵。右五言

司徒左西屬謝萬

肆眺崇阿。寓目高林。青蘿翳岫。脩竹冠岑。谷流清響。條鼓鳴音。玄壘吐潤。霏霧成陰。右四言

司冥卷陰旗。勾芒舒陽旌。靈液被九區。光風扇鮮榮。碧林輝翠萼。紅葩擢新莖。翔禽撫翰游。騰鱗躍清冷。右五言

上虞令華茂

林榮其鬱。浪激其隈。汎汎輕觴。載欣載懷。右四言



中軍叅軍孫嗣

望岩懷逸許臨流想竒莊誰云真風絕千載挹餘芳

右五言

陳郡袁嶠之

人亦有言得意則歡佳賓即臻相與遊盤微音迭詠馥焉  
若蘭苟齊一致遐想揭竿

右四言

四眺華林茂俯仰晴川渙激水流芳醪豁爾累心散遐想  
逸民軌遺音良可玩古人詠舞雩今也同斯歎

右五言

行叅軍王豐之

肆盼巖岫臨泉濯趾感興魚鳥安居幽跼

右四言

蘭亭集後序

孫綽

古人以水喻性有旨哉非所以淳之則清淆之則濁耶故  
振轡于朝市則充屈之心生閑步于林野則寥落之意興  
仰瞻羲唐邈然遠矣近詠臺閣碩探增懷聊于曖昧之中  
期乎瑩拂之道暮春之始楔于南澗之濱高領千尋長湖  
萬頃乃藉芳草鑑清流覽卉物觀魚鳥具類同榮資生成  
暢于是和以醇醪齊以達觀快然兀矣焉復覺鵬鷃之二  
物哉耀靈縱轡急景西邁樂與時去悲亦系之徃復推移  
新故相換今日之迹明復陳矣原詩人之致興諒歌詠之  
有由文多不載大畧如此所賦詩亦裁而綴之如前四言



五言焉。

附蘭亭帖集說上

蘭亭詩兼公權續得者亦封上伏惟檢領入選餘異面話不次十二日公權狀上給事閣老閣下

右唐柳公權書

右唐中書令河南褚遂良所搨晉右將軍王羲之蘭亭宴集序并諫議大夫柳公權所得羣賢詩御史檢法李公麟製畜皆駙馬王晉卿家所藏可謂三絕崇寧三年六月十五日襄陽米芾書

右宋米芾題帖後

聞知會稽縣向子固有褚遂良所臨蘭亭敘後有米芾題



識鄉可取進來欲一閱之十四日付孟庾

右宋高宗御書

蘭亭敘却付鄉廿四日

右宋高宗御書

附蘭亭帖集說下

晉穆帝永和九年暮春王右軍與親友四十二人脩禊于  
蘭亭揮毫製序興樂而書道媚勁健謂有神助醒後連日  
再書數十百紙終不能及右軍自珍愛之秘藏于家七傳  
而至智永子徽之派也舍俗爲僧居越之永欣寺以能書  
名其蘭亭敘則以授弟子辨才辨才寶愛此帖藏之寢室  
梁上置匣貯之人所罕見唐太宗酷好二王書收真跡幾  
三千六百紙暇日與魏證論二王書法證曰右軍存日自  
喜者蘭亭敘今在辨才所太宗欲即取之證曰辨才寶此  
過于頭目未易遽索後召至長安因作贗本以示之辨才



曰右軍作此三百二十五字。夢天台白雲子傳授筆訣。以永字爲法。深恨所收真跡。兵火之餘。求之不獲。上留辨才而密遣人搜訪。但得智永千文以歸。後辨才託疾還山房。玄齡薦御史蕭翼負才藝多權謀。必能稱旨。翼梁元帝曾孫也。太宗以命之。翼曰。若作公使。義無得理。願得二王雜帖三四通。間行以往。太宗給之。翼遂易冠微服。至湘潭。隨客舟至越。潦倒真得山東書生體。每旦必入永欣寺觀畫。壁過辨才院。則休于門。辨才問曰。何處檀越。翼荅以北人。寒暄絕畢。語意投合。延入圍碁。撫琴談文。握槊情甚相得。便留夜飲。設缸面新筍江東云。缸面猶河北甕頭新醞也。

酒酣探韻賦詩。辨才得來字。詩曰。初醞一缸開。新知萬里來。披雲同落莫。步月共徘徊。夜久孤琴思。風長旅雁哀。非君有秘術。誰照不然灰。翼得招字。詩曰。解逅款良宵。殷勤荷勝招。彌天俄若舊。初地豈成遙。酒蟻傾還泛。心猿跡自調。誰憐失群翼。常苦葉風飄。妍蚩畧同。彼此諷詠。自恨相知之晚。綢繆踰月。翼示以乃袒手書職貢圖。歎賞不已。因談論翰墨。翼曰。先世皆傳二王楷書法。自幼耽玩。亦有數帖自隨。辨才欣然。約以明日携至。如期而往。熟視數過。曰。是則是矣。非得意時書。貧僧有一真跡。翼曰。何帖。荅以蘭亭。翼佯笑曰。數經亂離。真跡豈在。辨才曰。先師寶惜。臨終



親付于吾。付授有緒。明旦來看。翼至。自梁上匣內出之。翼見故指瑕。摘類分競不定。自示翼之後。不更置梁上。并翼二王帖。借留几間。辨才時年六十餘。日臨數過。老而彌篤。翼往還既密。辨才偶出。赴嚴遷家齋。翼來謂守房弟子曰。忘淨巾在內。乃為撤閱。遂取蘭亭。並二王帖。函出於永安驛。呼驛長凌。愬告曰。我是御史。奉墨勅在此。可報汝都督齊善行。馳至。則宣示墨勅。辨才時猶在嚴遷家。聞命。不知所以。見所謂御史者。乃翼也。聞取帖。驚倒仆地。久始甦。翼遂奉帖。馳驛以進。太宗大悅。擢為員外郎。賜以金縷瓶。瑪璃碗。良馬莊宅。以立齡舉得其人。賜錦綵千段。始怒辨才。

慳吝不與。數日後。仍賜物三千段。穀三千斛。辨才不敢自私。施於寺。建塔三級。帝得帖。命馮承素。韓道政等。各搨數本。分賜皇太子。諸王。近臣。而一時能書。如歐。虞。褚。諸公。皆臨搨相尚。貞觀二十三年。太宗不豫。幸玉華宮。舍風殿。命太子浩。以蘭亭敘。從葬昭陵矣。今馮承素等所搨之本。在者一本。尚直錢數萬也。

右見法書要錄。何延年蘭亭記。尚書故實。并唐野史。

蘭亭敘。梁亂出外。陳天嘉中。為僧智永所得。至大建中。獻宣帝。隨平陳。帖歸晉王廣。王不之愛。僧果從王借搨。及登位。終不求索。僧果死。辨才得之。太宗為秦王。因見搨本。知

朱子綱目。梁太祖。開平二年冬。十月。華原賊帥。溫。翰。發唐諸陵。集註。歐。史。云。翰。搨唐諸陵。見。昭。陵。中。石。函。鐵。匣。藏。前。世。圖。畫。鍾。王。筆。迹。依。墨。如。新。志。取。之。遂。傳。人。間。



在辨才處遣蕭翼取之。武德四年入秦府，貞觀十年始搨以分賜近臣。

右見劉餗嘉話

王羲之常書蘭亭會序，隋末廣州好事僧有三寶，一而持之，一曰蘭亭書，二曰神龜，以銅為之，受水一升，以水貯腹則能行。三曰如意，以鉄為之，光明洞徹，色如水晶。唐太宗特工書，聞右軍之蘭亭真跡，求之得其他本，若第一本，知在廣州僧，而難以力取，故令人詐僧，果得其書，僧曰：「第一寶無矣，其餘何愛？」乃以神龜如意皆棄之。

右見紀聞并書斷

唐太宗詔供奉蘭亭敘，惟率更令歐陽詢自搨之本，奪真勒石，留之禁中。他本付之于外。一時貴尚，爭相打搨，禁中石本獨得完善。敬瑄石晉不綱，契丹自中原輦寶貨，畱書以北，至殺胡林，德光死，永康立國，乃交兵棄石而歸。慶曆中，李學究者得之，韓獻忠壻也，始以墨本示公，索石觀。李瘞之地中，李死，其子出石，始售于人。本必千錢，由是好事者稍得之。後李氏子負官緡，無償，時宋景文公守定武，以金代輸，取石匣藏于庫，非貴游交舊不可得也。熙寧間，薛師正出牧，求者沓至，薛惡其模打有損，乃刊別本于外，多持此以惠求者，此郡真贗已有二刻矣。其子紹彭又摹之，他



石潛易原刻。暗以自別。遂于古刻。湍流帶左右五字。各刻損一二筆為識。或又謂古仰字如針眼。殊字如蟬爪。列字如丁形。又云字微帶肉。是唐古刻。大觀中始取此石于薛氏家。其子嗣昌進上御府。徽廟龕置宣和殿。

右見何子楚跋語。

薛紹彭既易定武石刻。祐陵取入靖康之變。金人盡取御府珍玩。以北此石非虜所識。獨得留焉。宗汝霖為留守。見之。并取內帑所掠不盡之物。馳進高宗。時駐蹕維揚。日置左右。踰月。虜騎至。倉卒渡江。後竟失之。向子固為揚帥。高宗嘗令冥搜之。不獲。

右見王明清揮麈錄。

王大醇詩云。昭陵永闕千年跡。定武猶傳幾樣碑。此是中原舊時本。石今焉往落東夷。

右見曾宏父識。

定蘭審定訣我生。適癸丑倒指十四周。中間幾今古。沿革難泝流。長歌繫顛末。後山無與儔。區區訪寡陋。欲陳良贅疣。書家一詞稱。定本審定由來有。要領擅墨或因三疊紙。針爪天成八段錦。中古亭列九處剜。取後流湍五字損。畧畫八麓九更長。空一尾行意不盡。歐公集古莫之珍。道祖懷璧西歸秦。雲林寶晉闕博雅。肉骨喻借修江人。近世王



尤好多識肥瘦聚訟徒紛紜手追賴有吳姜單粗于斯文能寫真真偽要區別驪黃俱小節模拓偶濃淡豈足病竒絕取玉棄木石貴完次剥缺鑿裁當精深副以右方訣

右見曹氏跋尾詩句 後有閑句不書

蘭亭內永字無畫發筆處微拆轉 和字口下橫筆稍出

年字懸筆上湊頂 在字左ノ反剔 歲字有點在山

下戈畫之右 事字斜拂不挑 流字內厶字就回筆不

是點 是字下三轉筆 趣字波畧反向上 殊字挑脚

帶橫 欣字欠一筆作章草法不是捺 抱字已開口

亦大矣亦字是四點 興感感字戈點 闕闕直 未嘗不

不字脚有一缺

右法如此甚多畧舉其大槩持此法亦可觀天下之蘭亭矣

右見姜夔禊帖偏傍考

十七帖中遠想慨然孔琳之帖恨 脚中轉劇等字本皆

側注後人模以入行雖失格體猶于理未害至于讀蘭亭

敘者以不知老之將至旁一僧字為逸少作曾字之誤借

使入行中則害理矣按古蘭亭敘本二十八行至十四行

特濶者蓋紙接尾而不與知字適在此行之末梁舍人徐

僧權于其旁著名當時謂之押縫梁御府法書多如此此



帖僧字下失其權字近世人殊不知此乃云僧者曾之誤  
因讀爲曾不知老之將至非也又按晉史逸少本傳及  
書錄皆載此序而序中並無曾字益是可正耳

右見黃伯思法帖刊誤並法書廣錄

右蘭亭諸說今擇其當者錄于此其他浩繁之論皆  
不紀之愚以爲書學之工亦小道耳誠不可留意于  
此要當寓意以適情興志於臨池之學者又當知之  
偶乘秋涼以蘭亭諸說書此卷後久不作楷殊媿庸  
俗但知識其事誠未暇較其工拙也 七月二十五

日 蘭雪軒圖書

偶閱石刻蘭亭詩序並圖舊卷愛其詩因抄寫之  
期以便讀並及諸說未審何賢所集閱其畝書一  
爲蘭雪軒一爲東書堂圖書記而不著姓氏噫殆  
敦本務學之君子而惡鈞其名者耶附識于後三  
月二十八日門詔書



跋

右軍蘭亭序世所全寶貴矣得此圖畫以紀其盛使當年  
情景一如在目前恍置此身於山陰會中親見諸君子列  
諸坐次其毫髮悉可指而數也而世之見此圖畫者希矣  
故載之集中以公諸好古君子有不覽之而全然快心者  
豈情也哉金門詔敬書



此書始於金國... 其書之始也... 其書之始也... 其書之始也...

此書始於金國... 其書之始也... 其書之始也... 其書之始也...

此書始於金國... 其書之始也... 其書之始也... 其書之始也...





